

舊五代史



舊五代史卷四十三

宋司空同中書門下平章事薛居正等撰

明宗紀第九

唐書十九

長興三年春正月癸未朔帝御明堂殿受朝賀仗衛如式丁亥陝州節度使安從進移鎮延州己丑遣邠州節度使藥彥稠靈武節度使康福率步騎七千往方渠討党項之叛者庚寅以前北京副留守呂夢奇爲戶部侍郎辛卯以前彰國軍留後孫漢韶爲利州節度使充西面行營副部署兼步軍都指揮使庚子契丹遣使朝貢辛丑秦王從榮加開府儀同三司兼中書令戊申詔選

人文辭不合式樣罪在發解官吏舉人落第次年免取
文解中書門下奏請親王官至兼侍中中書令則與見
任宰臣分班定位宰臣居左親王居右如親王及諸使
守侍中中書令亦分行居右其餘使相依舊從之渤海
廻鶻吐蕃遣使朝貢大理正張居琛上言所頒諸州新
定格式律令請委諸處各差法直官一人專掌檢討從
之二月乙卯制晉國夫人夏氏追冊爲皇后丙辰幸龍
門詔故皇城使李從璨可贈太保詔出選門官罷任後
周年方詳擬議自于所司投狀磨勘送中書又詔罷城
南稻田務以其所費多而所收少欲復其水利資于民

間礮礮故也秦州秦州界三縣之外別有一十一鎮人戶係鎮將徵科欲隨其便宜復置隴城天水二縣以隸之詔從之甲子幸至德宮以右衛大將軍高居貞爲右監門衛上將軍庚午以前華州節度使李從昶爲左驍衛大將軍以前夔州節度使安崇阮爲右驍衛上將軍以前新州節度使翟璋爲右領軍上將軍以右領軍上將軍羅周敬爲右威衛上將軍辛未中書奏請依石經文字刻九經印板從之

案五代會要長興三年二月中書門下奏請依石經文字刻九

經印板勅令國子監集博士儒徒將西京石經本各以所業本經多爲抄寫仔細看讀然後催召能雕字匠人各部隨帙刻印板廣頒天下如諸色人要寫經書並請依所印刻本不得更使礮本交錯蓋刻板之流行寔始

於此愛日齋叢鈔云通鑑載後唐長興三年二月辛未
初令國子監校定九經雕印賣之又曰自唐末以來所
在學校廢絕蜀毋昭裔出私財百萬營學館且請板刻
九經蜀主從之由是蜀中文學復盛又曰唐明宗之世
宰相馮道李愚請令判國子監田敏校定九經刻板印
賣從之後周廣順三年六月丁巳板成獻之由是雖亂
世九經傳布甚廣王仲言揮塵錄云毋昭裔貧賤時
嘗借文選于交遊間其人有難色發憤異日若貴當板
以鏤之遺學者後仕王蜀爲宰相遂踐其言刊之印行
書籍創見于此事載陶岳五代史補後唐平蜀明宗命
太學博士李錡書五經仿其製作刊板于國子監爲監
中刻書之始猗覺寮雜記云雕印文字唐以前無之
唐末益州始有墨板後唐方鏤九經悉收人間所有經
史以鏤板爲正見兩朝國史此則印書已始自唐末矣
案柳氏家訓序中和三年癸卯夏鑾輿在蜀之三年也
余爲中書舍人旬休閱書于重城之東南其書多陰陽
雜記占夢相宅九宮五緯之流又有字書小學率雕板
印紙浸染不可盡曉葉氏燕語正以此證刻書不始于
馮道而沈存中又謂板印書籍唐人尙未盛行爲之自
馮瀛王始印五經目後典籍皆爲板本大槩唐末漸有

印書特未盛行後人遂以爲始于蜀也當五季亂離之際經籍方有託而流布于四方天之不絕斯文信矣甲戌靈武奏都指揮使許審環等謀亂伏誅藥彥稠奏誅党項阿埋等十族與康福入白魚谷追襲叛黨獲大首領六人諸羌二千餘人孳畜數千及先刼掠到廻鶻物貨詔彥稠軍士所獲並令自收勿得箕歛已卯以前河中節度使索自通爲鄜州節度使懷化軍節度使李贊華進契丹地圖詔司天臺除密奏留中外應奏厯象雲物水旱及十曜細行諸州災祥宜並報史館以備編修壬午藥彥稠進廻鶻可汗先送秦王金裝胡韞爲党項所掠至是得之以獻帝曰先詔所獲令軍士自收今

何進也令彥稠却與獲者三月甲申契丹遣使朝貢靈武軍將裴昭隱等二人與進奏官阮順之隱官馬一匹有司論罪合抵法帝曰不可以一馬殺三人命笞而釋之丙申西京奏百姓侯可洪於楊廣城內掘得宿藏玉四團進納賜可洪二百緡絹二百疋庚子以前鄆州節度使孫璋卒廢朝癸卯帝顧謂宰臣曰春雨稍多久未晴霽何也馮道對曰水旱作沴雖是天之常道然季春行秋令臣之罪也更望陛下廣敷恩宥久雨無妨于聖政也丁未以神捷神威雄武廣捷已下指揮改爲左右羽林軍置四十指揮每十指揮立爲一軍軍置都指揮

使一人庚戌帝觀稼于近郊民有父子三人同挽犂耕者帝閱之賜耕牛三頭高麗國遣使朝貢以右領軍上將軍翟璋爲右羽林統軍以前安州留後周知裕爲左神武統軍夏四月甲寅詔諸道節度使未帶使相及防禦團練使刺史班位居檢校官高者爲上加檢校官同以先授者爲上前資在見任之下新羅王金溥遣使貢方物戊午中書奏準勅重定三京諸州府地望次第者舊制以王者所都之地爲上今都洛陽請以河南道爲上關內道爲第二河東道爲第三餘依舊制其五府按十道圖以鳳翔爲首河中成都江陵興元爲次中興初

升魏州爲興唐府鎮州爲眞定府望升二府在五府之上合爲七府餘依舊制又天下舊有八大都督府以靈州爲首陝幽魏揚潞鎮徐爲次其魏鎮已升爲七府兼具員內相次升越杭福潭等州爲都督望以十大都督府爲額仍據升降次第以陝爲首餘依舊制十道圖有大都護請以安東大都護爲首防禦團練等使自來升降極多今具現在具員依新定十道圖以次其第爲定從之契丹累遣使求歸扎刺特里袞舊作則刺惕隱今改正等幽州趙德鈞奏請不俞允帝顧問侍臣亦以爲不可與帝意欲歸之會冀州刺史楊檀罷郡至闕帝問其事奏曰

此輩來援王都謀危社稷陛下寬慈貸其生命苟若歸之必復向南放箭旣知中國事情爲患深矣帝然之旣而只遣哲爾格錫里

舊作則骨舍利今改正

隨來使歸蕃不欲全

拒其請也詔贈皇后曹氏曾祖父母以下爲太傅太尉太師國夫人淑妃王氏曾祖父祖父母爲太子太保太傅太師國夫人壬戌前樞密使驃騎大將軍馬紹宏卒癸亥以懷化軍節度使李贊華爲滑州節度使初帝欲以贊華爲藩鎮范延光等奏以爲不可帝曰吾與其先人約爲兄弟故贊華來附吾老矣倘後世有守文之主則此輩招之亦不來矣由是近臣不能抗議甲子以太子賓

客蕭遽爲戶部尙書致仕乙丑以天雄軍節度使宋王從厚兼中書令辛未以幽州節度使趙德鈞兼中書令五月壬午朔帝御文明殿受朝詔禁網羅彈射弋獵丁亥以二王後前詹事府司直楊延紹爲右贊善大夫仍襲封鄴國公食邑二千戶丁酉以太子太師致仕孔勅卒廢朝興元奏東西兩川各舉兵相持甲辰以文宣王四十三代孫曲阜縣主簿孔仁玉爲兗州襲邱令襲文宣公戊申襄州奏漢江大漲水入州城壞民廬舍樞密使奏近知兩川交惡如令一賊兼有兩川撫眾守險恐難討除欲令王思同以興元之師伺便進取詔從之六

月壬子朔幽州趙德鈞奏新開東南河自王馬口至淤口長一百六十五里闊六十五步深一丈二尺以通漕運舟勝千石畫圖以獻甲寅以權知高麗國事王建爲檢校太保封高麗國王丁巳衛州奏河水壞堤東北流入御河戊午荆南奏東川董璋領兵至漢州西川孟知祥出兵逆戰璋大敗得部下人二十餘走入東川城尋爲前陵州刺史王暉所殺孟知祥已入梓州辛酉范延光奏曰孟知祥兼有兩川彼之軍眾皆我之將士料其外假朝廷形勢以制之然陛下苟不能屈意招攜彼亦無由革面帝曰知祥予故人也以賊臣間諜故茲阻隔

今因而撫之何屈意之有由是遣供奉官李瓌使西川
賁詔以賜知祥詔以霖雨積旬久未晴霽京城諸司繫
囚並宜釋放甲子以大雨未止放朝參兩日洛水漲泛
二丈廬舍居民有溺死者以前濮州刺史武延翰爲左
領軍上將軍前階州刺史王宏贇爲左千牛上將軍金
徐安頴等州大水鎮州旱詔應水旱州郡各遣使人存
問秋七月辛巳朔以天下兵馬元帥尚父吳越國王錢
鏐薨廢朝三日丙戌詔賜諸軍救接錢有差戊子正衙
命使冊高麗國王王建靈武奏夏州界党項七百騎侵
擾當道出師擊破之生擒五十騎追至賀蘭山下己丑

兩浙節度使錢元瓘起復加守尙書令青州節度使王晏球加兼中書令秦鳳充宋亳潁鄧大水漂邑屋損苗稼夔州赤甲山崩壬辰以前太僕卿鄭績爲鴻臚卿以前兗州行軍司馬李鱗爲戶部尙書乙未福建節度使王延鈞進絹表云吳越王錢鏐薨乞封臣爲吳越王湖南馬殷官是尙書令殷薨請授臣尙書令不報戊戌太子賓客李光憲以禮部尙書致仕乙亥以前靈武節度使康福爲涇州節度使幽州衙將潘杲上言知故使劉仁恭于大安山藏錢之所樞密院差人監往發之竟無所得以皇子西京留守京兆尹從珂爲鳳翔節度使廢

鳳州武興軍節制爲防禦使並所管興文二州並依舊
隸興元府丁未以門下侍郎兼吏部尙書同平章事監
修國史趙鳳爲檢校太傅同平章事充邢州節度使詔
諸州府遭水人戶各支借麥種及等第賑貸八月辛亥
青州節度使王晏球卒廢朝二日以利州節度使孫漢
韶兼西面行營招討使甲寅以前振武節度使張萬進
爲鄧州節度使己未以鄆州節度使房知溫兼中書令
移鎮青州丙寅以宰臣李愚爲門下侍郎平章事監修
國史己亥以湖南節度使馬希聲卒廢朝乙卯吐蕃遣
使朝貢九月壬午以鎮南軍節度使檢校太傅馬希範

爲湖南節度使檢校太尉兼侍中甲申荆南節度使檢校太傅兼中書令高從誨加檢校太尉兼中書令壬辰供奉官李瓌自西川回節度使孟知祥附表陳敘隔絕之由並進物先賜金器等瓌知祥甥也母在蜀故令瓌往焉瓌至蜀具述朝廷厚待之意知祥稱藩如初奏福慶長公主以今年正月十二日薨又奏五月三日大破東川董璋之眾於漢州收下東川又表立功將校趙季良等五人乞授節鉞部內刺史令錄已下官乞許墨制補授帝遣閣門使劉政恩充西川宣諭使乙丑契丹遣使自幽州進馬秦州地震冬十月己酉朔再遣供奉官

李瓌使西川兼押賜故福慶長公主祭贈絹三千匹并
賜知祥玉帶先是兩川隔遠朝廷兵士不下三萬人至
是知祥上表乞發遣兵士家屬入川詔報不允知祥所
奏兩川部內文武將吏乞許權行墨制除補訖奏詔從
之知祥所奏立功大將趙季良等五人正授節鉞續有
處分襄州奏漢水溢壞民廬舍癸丑以太常卿劉岳卒
廢朝乙未以兵部侍郎張文寶爲吏部侍郎以戶部侍
郎藥縱之爲兵部侍郎庚申幸至德宮因幸石敬瑭李
從昶李從敏之第壬申大理少卿康澄上疏曰臣聞安
危得失治亂興亡誠不係于天時固非由於地利童謠

非禍福之本妖祥豈隆替之源故雖雉昇鼎而桑穀生
朝不能止殷宗之盛神馬長嘶而玉龜告兆不能延晉
祚之長是知國家有不足懼者五有深可畏者六陰陽
不調不足懼三辰失行不足懼小人訛言不足懼山崩
川涸不足懼蠱賊傷稼不足懼此不足懼者五也賢人
藏匿深可畏四民遷業深可畏上下相徇深可畏廉恥
道消深可畏毀譽亂真深可畏直言蔑聞深可畏此深
可畏者六也伏惟陛下尊臨萬國奄有八紘蕩三季之
澆風振百王之舊典設四科而羅俊彥提兩柄而御英
雄所以不軌不物之徒咸思革面無禮無儀之輩相率

懷心然而不足懼者願陛下存而勿論深可畏者願陛下修而靡忒加以崇三綱五常之教敷六府三事之歌則鴻基與五岳爭高盛業共磐石永固優詔獎之澄言可畏六事寔中當時之病識者許之癸酉湖南馬希範荆南高重誨並進銀及茶乞賜戰馬帝還其直各賜馬有差丁丑帝謂范延光曰如聞禁軍戍守多不稟藩臣之命緩急如何驅使延光曰承前禁軍出戍便令逐處守臣管轄斷決近似簡易帝曰速以宣命條舉之十一月辛巳以三司使左武衛大將軍孟鵠爲許州節度使以前許州節度使馮贇爲宣徽使判三司以宣徽北院

月孟漢瓊判院事壬午史館奏宣宗已下四廟未有實

錄請下兩浙荆湖購募野史及除目報狀從之

五代會要載十

一月四日史館奏當館昨爲大中以來迄于天祐四朝實錄尙未纂修尋具奏聞謹行購募勅命雖頒于數月圖書未貢于一編蓋以北土州城久罹兵火遂成滅絕難可訪求切恐歲月漸深耳目不接長爲闕典過在攸司伏念江表列藩湖南奧壤至于閩越方屬勲賢戈鉞自擾于中原屏翰悉全于外府固多奇士富有羣書其兩浙福建湖廣伏乞詔旨委各于本道採訪宣宗懿宗僖宗昭宗以上四朝野史及逐朝日曆銀臺事宜內外制詞百司沿革簿籍不限卷數據有者抄錄上進若民間收得或隱士撰成卽令各列姓名請議爵賞

癸

未以左僕射致仕鄭珏卒廢朝丁亥以河陽節度使兼

六軍諸衛副使石敬瑭爲河東節度使兼大同彰國振

武威塞等軍蕃漢馬步總管時契丹帳族在雲州境上

與羣臣議擇威望大臣以制北方故有是命乙丑樞密使趙延壽加同平章事詔在京臣寮不得進奉賀長至馬及諸物甲午日南至帝御文明殿受朝賀乙亥河中節度使李從璋加檢校太傅以右散騎常侍楊凝式爲工部侍郎庚子以秘書監盧文紀爲工部尙書以工部尙書崔居儉爲太常卿以工部侍郎鄭韜光爲禮部侍郎乙巳雲州奏契丹王在黑榆林南造攻城之具帝遣使賜契丹王銀器綵帛十二月戊申朔供奉官丁延徽倉官田繼勲並棄市坐擅出倉粟數百斛故也教坊伶官敬新磨受賄爲人告帝令御史臺徵還其錢而後撻

之癸丑幸龍門觀脩伊水石堰賜丁夫酒食後數日有
司奏丁夫役限十五日已滿工未畢請更役五日帝曰
不唯時寒且不可失信于小民卽止其役甲寅以太子
賓客歸藹卒廢朝戊午以前宣徽使朱弘昭爲襄州節
度使康義誠爲河陽節度使充侍衛親軍馬步軍都指
揮使壬戌以吏部侍郎姚顗爲尙書左丞以尙書左丞
王權爲禮部尙書以兵部侍郎藥縱之爲吏部侍郎以
翰林學士中書舍人程遜爲戶部侍郎依前充職戊辰
帝畋於近郊射中奔鹿是冬無雪

永樂大典卷七
千一百六十六

舊五代史卷四十三

卷四十三

三

舊五代史卷四十三終

舊五代史卷四十三攷證

唐明宗紀九遣邠州節度使藥彥稠 邠州歐陽史作

靜難軍

藥彥稠奏誅党項阿埋等十族與康福入白魚谷 白

魚谷歐陽史作牛兒谷

戊午荆南奏東川董璋領兵至漢州西川孟知祥出兵
逆戰璋大敗 案通鑑孟知祥克東川在五月五代
春秋歐陽史俱作六月蓋以薛史奏聞之日爲據

供奉官李瓌 李瓌通鑑作李存瓌唐人避莊宗諱故
去存字

秋七月辛巳朔以天下兵馬元帥尙父吳越王錢鏐薨
廢朝三日 案五代春秋七月吳王錢鏐薨蓋祇以
薛史廢朝之日爲據也通鑑作三月庚戌與九國志
異

丙戌詔賜諸軍救接錢有差 案救接錢疑有舛誤攷
冊府元龜亦作救接今仍其舊

癸亥以湖南節度使馬希聲卒廢朝 案通鑑馬希聲
卒在七月辛卯五代春秋從是書作八月

扎拉特哩袞舊作則刺惕隱今改 哲爾格錫里舊作
則骨舍利今改 納喇泊舊作捺刺泊今改

舊五代史卷四十三攷證

舊五代史卷四十四

宋司空同中書門下平章事薛居正等撰

明宗紀第十

唐書二十

長興四年春正月戊寅朔帝御明堂殿受朝賀仗衛如式是日雪盈尺戊子秦王從榮加守尙書令兼侍中依前河南尹判六軍諸衛事庚寅以端明殿學士尙書兵部侍郎劉昫爲中書侍郎平章事甲午正衙命使冊故福慶長公主孟氏爲晉國雍順長公主遣太常卿崔居儉赴西川行冊禮突厥內附庚子以前河東節度使李從溫爲鄆州節度使二月癸丑朔帝于便殿問范延光

內外見管馬數對曰三萬五千疋帝嘆曰太祖在太原
騎軍不過七千先皇自始至終馬纔及萬今有鐵馬如
是而不能九州混一是吾養士練將之不至也吾老矣
馬將奈何延光奏曰臣每思之國家養馬太多試計一
騎士之費可贍步軍五人三萬五千騎抵十五萬步軍
旣無所施虛耗國力臣恐日久難繼帝曰誠如卿言肥
騎士而瘠吾民何益哉五代會要上問見管馬數樞密
使范延光奏天下常支草粟者
近五萬匹見今西北諸道蕃賣馬者往來如市其郵傳
之費中估之直日以四十五貫以臣計之國力十耗其
七馬無所使財賦漸消朝廷甚非所利上善之十月敕
沿邊蕃鎮或有蕃部賣馬可擇其良壯給券具數以聞
丁巳以虔州節度使檢校太尉兼侍中馬希振爲洪州

節度使以鄂州節度使馬希廣爲檢校太尉同平章事
充桂州節度使以廬州節度使兼武安軍副使姚彥章
爲檢校太尉同平章事以靜江節度副使馬希範爲鄂
州節度使故潞州節度使檢校太保康君立贈太傅已
未宋州節度使安元信加兼侍中濮州進重修河堤圖
沿河地名厯厯可數帝覽之愀然曰吾佐先朝定天下
於此提塢間小大數百戰又指一邱曰此吾環甲臺也
時事如昨奄忽一紀令人悲嘆耳癸亥以西川節度使
孟知祥爲劍南東西兩川節度使封蜀王三司奏當省
有諸道鹽鐵轉運使衙職員都押衙正押衙同押衙通

引衙前虞候子弟今欲列爲三司職名從之庚午以御史中丞崔衍爲兵部侍郎以右諫議大夫龍敏爲御史中丞三月己卯幸龍門延州節度使安從進奏夏州節度使李仁福卒其子彝超自稱留後甲申鎮州奏行軍司馬趙瓌節度判官陸浣元從押衙高知柔等並棄市坐受賂枉法殺人也節度使李從敏罰一季俸乙酉以西川節度副使知武泰軍節度兵馬留後趙季良爲檢校太保黔南節度使以西川諸軍馬步都指揮使知武信軍節度兵馬留後李仁罕爲檢校太傅遂州節度使以西川左廂馬步指揮使知保甯軍節度兵馬留後趙

廷隱爲檢校太保閬州節度使以西川右廂馬步都指揮使知寧江軍兵馬留後張知業爲檢校司徒夔州節度使以西川衙內馬步都指揮使知昭武軍兵馬留後李肇爲檢校太保利州節度使從孟知祥之請也丙戌賜宰相李愚絹百匹錢十萬鋪陳物一十三件時愚病帝令近臣翟光鄴宣問所居寢室蕭然四壁病榻敝毡而已光鄴具言其事故有是賜戊子以延州節度使安從進爲夏州留後以夏州左都押衙四川防遏使李彝超爲延州留後仍命邠州節度使藥彥稠宮苑使安重益帥師援送從進赴鎮以左衛上將軍盧文進爲潞州

節度使以右龍武統軍張溫爲雲州節度使庚寅以鳳翔行軍司馬李彥琮爲鹽州防禦使時范延光等奏請因夏州之師制置鹽州故有是命癸巳以右威衛上將軍安重霸爲同州節度使巳亥以左龍武統軍符彥超爲安州節度使詔除放京兆秦岐邠涇延慶同華興元十州長興元年二月係欠夏秋稅物及營田莊宅務課利以其曾輦運供軍糧料也甲辰故晉國夫人夏氏追冊皇后有司上諡曰昭懿從之夏四月戊申李彝超奏奉詔除延州留後巳受恩命訖三軍百姓擁隔未遂赴任帝遣閤門使蘓繼顏賁詔促彝超赴任癸丑以刑部

侍郎劉贊爲秘書監秦王傅

按五代會要長興四年四月以秘書監劉贊爲秦王

傅前忠武軍節度判官蘓瓚爲秦王友前襄州觀察使魚崇遠爲秦王府記室參軍時言事者請爲秦王置師傅上顧問近臣皆以秦王名勢隆盛不敢置議請自選擇乃降是命

甲寅前鄧州節度使

梁漢順以太子少師致仕太子賓客裴皞以兵部尙書

致仕戊午追冊昭宗皇后何氏爲宣穆皇后祔饗太廟

百寮進名奉慰廢朝三日己巳以左散騎常侍任贊爲

戶部侍郎以吏部侍郎藥縱之爲曹州刺史癸酉延州

奏蕃部刼掠餉運及攻城之具守蘆關兵士退守金明

鎮五月丙子朔帝御文明殿受朝戊寅皇子鳳翔節度

使從珂封潞王新授戶部侍郎任贊改刑部侍郎贊訴

以所授官是丁憂闕故改焉皇子從益封許王鄆州節

度使李從溫封兗王河中節度使李從璋封洋王鎮州

節度使李從敏封涇王甲申帝避暑于九曲池旣而登

樓風毒暴作聖體不豫翌日而愈

北夢瑣言上聖體乖和馮道對展膳之問

動思調衛因指御前果實日如食桃不康翼日見李而思戒可也初上因御李暴得風虛之疾馮道不敢斥言因奏事諷

悟上意

丙戌契丹遣使朝貢丁酉安從進奏大軍已

至夏州攻外城以其不受命也庚子以靈武留後張希

崇爲本州節度使辛丑故夏州節度使朔方郡王李仁

福追封號王壬寅以前晉州留後薄文爲本州節度使

六月丙午朔文武百寮宰臣馮道等拜章請于尊號內

加廣運法天四字凡拜二章詔允之詔宮西新園宜名永芳園其間新殿宜名和慶殿丙辰秦王從榮加食邑至萬戶寔封二千戶丁巳以右驍衛上將軍李從昶爲左龍武統軍以前邢州節度使高允韜爲右龍武統軍以右驍衛上將軍羅周敬爲左羽林統軍以右監門上將軍婁繼英爲金州刺史戊午宋王從厚加食邑至萬戶寔封一千戶壬戌以前涇州節度使李金全爲滄州節度使癸亥詔御史中丞龍敏等詳定大中統類甲子第十四女封壽安公主第十五女封永樂公主丙辰以前利州節度使孫漢韶爲洋州節度使壬申永甯軍節

度使容州管內觀察使檢校太尉兼侍中馬存加食邑
實封甲戌帝復不豫秋七月丁丑以著作佐郎尹拙爲
左拾遺直史館國朝舊制皆以畿赤尉直史館今用諫
官自拙始從監修李愚奏也已卯東岳三郎神贈威雄
大將軍初帝不豫前淄州刺史劉遂清荐泰山僧一人
云善醫及召見乃庸僧耳問方藥僧曰不工醫嘗于秦
山中親覩嶽神謂僧曰吾第三子威靈可愛而未有爵
秩師爲我請之宮中神其事故有是命識者嫉遂清之
妖佞焉詔應臺官出行須令人訶引使軍巡職掌等規
避壬午詔安從進班師時王師攻夏州無功故也乙酉

以許州節度使孟鵠卒廢朝贈太傅詔賜在京諸軍將校優給有差時帝疾未痊軍士有流言故也丁亥兩浙節度使檢校太傅守中書令錢元瓘封吳王八月戊申帝被袞冕御明堂殿受冊徽號曰聖明神武廣運法天文德恭孝皇帝禮畢制大赦天下常赦所不原者咸赦除之已酉賜侍衛諸軍優給有差時月內再有頒給自茲府藏無餘積矣辛亥以晉州節度使薄文卒廢朝丁巳以右龍武統軍李從昶爲許州節度使戊午以秘書監高輅卒廢朝辛酉以太子太師致仕符習卒廢朝贈太師辛未秦王從榮以本官充天下兵馬大元帥加食

邑萬戶實封三千戶以右羽林統軍翟璋爲晉州節度使以太子賓客馬縞爲戶部侍郎壬申幸至德宮九月甲戌以戶部尙書李璘爲兵部尙書以前戶部尙書韓彥憚爲戶部尙書丙子幸至德宮戊寅樞密使范延光趙延壽並加兼侍中依前充使中書奏元帥儀注諸道節度使以下帶兵權者階下具軍禮參見其帶使相者初見亦展一度公禮天下軍務公事元帥府行帖指揮其判六軍諸衛事則公牒往來其官屬軍職委元帥府奏請從之癸未以兵部侍郎盧詹爲吏部侍郎丙戌宰臣馮道加左僕射李愚加吏部尙書劉昫加刑部尙書

戊子河陽節度使兼侍衛親軍都指揮使康義誠山南
西道節度使檢校太傅張虔釗並加同平章事宣徽南
院使判三司馮贇依前檢校太傅同平章事中書門下
同二品充三司使贇亡父名章故改平章事爲同二品
壬戌永甯公主石氏進封魏國公主興平公主趙氏進
封齊國公主皇孫重光重哲並授銀青光祿大夫檢校
工部尚書秦王宋王子也前洋州節度使梁漢鵬以太
子少傅致仕丁酉以右龍武統軍高允韜爲滑州節度
使以韶州刺史檢校司空王萬榮爲華州節度使萬榮
王妃之父也戊戌以樞密使趙延壽爲汴州節度使以

襄州節度使朱弘昭爲檢校太尉同平章事充樞密使
時范延光趙延壽相繼辭退樞密務及朱弘昭有樞密
之命又面辭訴帝叱之曰爾輩皆欲離朕左右怕在眼
前素養爾輩將何用也弘昭退謝不復敢言吏部侍郎
張文寶卒庚子清海軍節度使錢元璿加檢校太傅同
平章事中吳建武等軍節度使錢元璿加檢校太師兼
中書令以前滑州節度使李贊華遙領虔州節度使辛
丑詔天下兵馬大元帥秦王從榮班宜在宰臣之上案
代會要秦王從榮加兼中書令與宰臣分班左右定位
及爲天下兵馬元師勅曰秦王位隆將相望重磐維委
任既崇等威合異班壬寅以北面行營都指揮使易州
位宜在宰臣之上

刺史楊檀爲振武軍節度使冬十月丙午以前同州節度使趙在禮爲襄州節度使丁未以前滑州節度使張敬詢卒廢朝以刑部侍郎任贊爲兵部侍郎充元帥府判官戊午以前鳳翔節度使孫岳爲三司使庚申以樞密使范延光爲鎮州節度使以三司使馮贊爲樞密使辛酉以前潞州節度使李承約爲左龍武統軍以前威塞軍節度使王景戡爲右龍武統軍以左驍衛上將軍安崇阮爲左神武統軍以右監門上將軍高允貞爲右神武統軍壬戌以權知夏州事檢校司空李彝超爲夏州節度使檢校司徒丙寅詔在朝文武臣寮並與加恩

以受冊尊號也戊辰以前安州節度使楊漢章爲兗州
節度使以前雲州節度使張敬達爲徐州節度使庚午
以前兗州節度使張延朗爲秦州節度使壬申秦州節
度使劉仲殷移鎮宋州十一月丙子以前滄州節度使
盧質爲右僕射庚辰改慎州懷化軍爲昭化軍升洮州
爲保順軍辛巳以保大軍節度使檢校太尉鮑君福爲
保順軍節度使洮部等州觀察等使以彰義軍節度使檢
校太尉同平章事杜建徽爲昭化軍節度使慎瑞司等州
觀察使乙酉以前汴州節度使李從巖爲鄆州節度使
以鄆州節度使李從溫爲定州節度使丙戌新授右僕

射廬質奏臣忝除官合赴省上事若準舊例左右僕射上事儀注所費極多欲從權務簡只取尙書丞郎上事例止集南省屬寮及兩省官送上亦不敢輒援往例有費官用自量力排比兼不敢自臣曠廢前規他時任行舊制從之戊子帝不豫己丑大漸自廣壽殿移居雍和殿是夜四鼓後帝自御榻蹶然而興顧謂知漏宮女曰今夜漏幾何對曰四更因奏曰官家省事否帝曰省因睡出肉片如肺者數片便溺升餘六宮皆至慶躍而奏曰官家今日寔還魂也已食粥一器侍醫進湯膳至曙帝小康壬辰天下大元帥守尙書令兼侍中秦王從榮

領兵陣於天津橋內出禁軍拒之從榮敗奔河南府遇
害帝聞之悲駭幾落御榻氣絕而蘇者再由是不豫有
加癸巳馮道率百寮見帝于雍和殿帝雨泣哽噎曰吾
家事若此慚見卿等百寮皆泣下霑襟甲午賜宰臣樞
密使御衣玉帶康義誠已下錦帛鞍馬有差遣宣徽使
孟漢瓊召宋王子鄴都乙未以三司使孫岳爲亂兵所
害廢朝丁酉勅秦王府官屬除諮議參軍高輦已處斬
外元帥府判官兵部侍郎任贊配武州秘書監兼秦王
傅劉贊配嵐州河南少尹劉陟配均州並爲長流百姓
縱逢恩赦不在放還河南少尹李堯配石州河南府判

官司徒詡配甯州秦王友蘇瓚配萊州記室參軍魚崇
遠配慶州河南府推官王說配隨州並爲長流百姓河
南府推官尹誼六軍巡軍董裔張九思河南府巡官張
沆李潮江文蔚並勒歸田里應長流人並除名六軍判
官殿中監王居敏責授復州司馬六軍推官郭駿責授
坊州司戶並員外置所在馳駟發遣時宰相樞密使共
議任贊等已下罪馮道等曰任贊前在班行比與從榮
無舊除官未及月餘便逢此禍王居敏司徒詡疾病請
假將近半年近日之事計不同謀從榮所欵昵者高輦
劉陟王說三人昨從榮稱兵指闕之際沿路只與劉陟

高輦並轡耳語至天津橋南指日影謂諸判官曰明日
如今已誅王居敏矣則知其冗泛之徒不可一例從坐
朱弘昭意欲盡誅任贊已下馮贇力爭之乃已戊戌帝
崩于大內之雍和殿壽六十七二月癸卯朔遷梓宮
於二儀殿宋王從厚自鄴都至是日發哀百寮縞素于
位中書侍郎平章事劉昫宣遺制宋王從厚于柩前卽
皇帝位服紀以日易月一如舊制云明年四月太常卿
盧文紀上謚議曰聖智仁德欽孝皇帝廟號明宗宰臣
馮道議請改聖智仁德四字爲聖德和武欽孝皇帝宰
臣劉昫撰謚冊文宰臣李愚撰哀冊文是月二十七日

葬于徽陵

永樂大典卷七千一百六十六 五代史補

明宗之在位也一日幸倉塲觀納時主者以車駕塲臨懼得其罪較量甚輕明宗因謂之曰且朕自省事以來倉塲給散動經一二十年未畢今輕量如此其後稍折將何以償之對曰竭盡家產不足則繼之以身命明宗愴然曰只聞百姓養一家未聞一家養百姓今後每石加二斗耗以備鼠雀侵蠹謂之鼠雀耗倉糧起自此也五代史闕文明宗出自邊地老于戰陣卽位之歲年已六旬純厚仁慈本乎天性每夕宮中焚香仰天禱祝云某蕃人也遇世亂爲眾推戴事不獲已願上天早生聖人與百姓爲主故天成長興間此歲豐登中原無事言于五代粗爲小康

史臣曰明宗戰伐之勲雖高佐命潛躍之事本不經心會王室之多艱屬神器之自至諒由天贊匪出人謀及應運以君臨能力行于王化政皆中道時亦小康近代已來亦可宗也倘使重誨得房杜之術從榮有啟誦之

賢則宗祧未至于危亡載祀或歸于綿遠矣惜乎君親
可輔臣子非才遽泯烝嘗良可深嘆矣

永樂大典卷七
千一百六十六

舊五代史卷四十四終

舊五代史卷四十四攷證

唐明宗紀十以端明殿學士尙書兵部侍郎劉昫爲中書侍郎平章事 案歐陽史劉昫傳作長興三年拜中書侍郎兼刑部尙書同中書門下平章事與本紀繫年先後互異見吳縝纂誤

二月癸丑朔 案上文正月爲戊寅朔則二月不得爲癸丑朔原文疑有舛誤

帝于便殿問范延光內外見管馬數 案錦繡萬花谷引薛史作范延慶疑傳寫之訛

以刑部侍郎劉贊爲秘書監 刑部侍郎通鑑作兵部

侍郎歐陽史從是書

以著作佐郎尹拙爲左拾遺直史館 案五代會要尹拙爲左拾遺王慎徽爲右拾遺並直史館是書闕載王慎徽

戊子帝不豫 案歐陽史本紀十月壬申幸上和亭得疾家人傳十一月戊子雪明宗幸宮西上和亭得傷寒疾紀傳互異見吳縝纂誤

壬辰天下大元帥守尙書令兼侍中秦王從榮領兵陣于天津橋內出禁軍拒之從榮敗奔河南府遇害案五代春秋作壬午誅從榮蓋傳寫之訛歐陽史及

通鑑並從是書作壬辰

舊五代史卷四十四攷證

舊五代史卷四十五

宋司空同中書門下平章事薛居正等撰

閔帝紀

唐書二十一

閔帝諱從厚小字菩薩奴明宗第三子也

案歐陽史作明宗第五子

吳縝嘗辨其誤今考五代會要亦作第三子與薛史同

母昭懿皇后夏氏以天祐

十一年歲在甲戌十一月二十八日庚申生帝于晉陽

舊第帝髫鬢好讀春秋畧通大義貌類明宗尤鍾愛天

成元年授金紫光祿大夫檢校司徒二年四月加檢校

太保同平章事河南尹判六軍諸衛事十一月加檢校

太傅三年三月授汴州節度使四年移鎮河東長興元

年改授鎮州節度使尋封宋王二年加檢校太尉兼侍中移鎮鄴都三年加中書令秦王從榮帝同母兄也以帝有德望深所猜忌帝在鄴宮恒憂其禍然善于承順竟免間隙四年十一月二十日秦王誅翌日明宗遣宣徽使孟漢瓊馳駟召帝二十六日明宗崩二十九日帝至自鄴十二月癸卯朔發喪于西宮帝于柩前卽位丁未羣臣上表請聽政表再上詔允已酉中外將士給賜有差庚戌帝續服見羣臣于廣壽門之東廡下宰臣馮道進曰陛下久居哀毀臣等咸願一覩聖顏朱弘昭前舉帽羣臣再拜而退御光政樓存問軍民辛亥賜司衣

王氏死坐秦王事也癸丑以前鎮州節度使涇王從敏
權知河南府事尋以盧質代之乙卯賜司衣康氏死事
連王氏也丙辰以天雄軍節度判官唐訥爲諫議大夫
掌書記趙彖爲起居郎元從都押衙宋令詢爲磁州刺
史丁巳以左僕射平章事馮道爲山陵使戶部尙書韓
彥暉爲副中書舍人王延爲判官禮部尙書王權爲禮
儀使兵部尙書李鏘爲鹵簿使御史中丞龍敏爲儀仗
使右僕射權知河南府盧質爲橋道頓遞使庚申以前
相州刺史郝瓊爲右驍衛大將軍充宣徽北院使以光
祿卿充三司副使王玫爲三司使癸亥故檢校太尉右

衛上將軍充三司使孫岳贈太尉齊國公丁卯帝釋縗服羣臣三上表請服常膳御正殿從之辛未帝御中興殿羣臣列位馮道升階進酒帝曰比于此物無愛除賓友之會不近樽筯况在沉痛之中安事飲啖命徹之

應順元年春正月壬申朔帝御廣壽殿視朝百寮詣閤門奉慰時議者云月首以常服臨不視朝可也乙亥契丹遣使朝貢

遼史太宗紀天顯九年閏月戊午唐遣使來告哀即日遣使祭弔

丁丑以

太常卿崔居儉爲秘書監以前蔡州刺史張繼祚爲左武衛上將軍充山陵橋道頓遞副使戊寅御明堂殿仗衛如儀宮懸樂作羣臣朝服就位宣制大赦天下改長

興五年爲應順元年時議者以梓宮在殯宮懸樂作非禮也懸而不作可也廻鶻可汗仁美遣使貢方物故可汗仁裕進遺留馬是日命中使三十五人以先帝鞍馬衣帶分賜藩位庚辰宰臣馮道加司空李愚加左僕射劉昫加吏部尙書餘並如故壬午侍衛親軍馬步軍都指揮使河陽節度使康義誠加檢校太尉兼侍中判六軍諸衛事甲申以侍衛馬軍都指揮使寧國軍節度使安彥威爲河中節度使以侍衛步軍都指揮使忠正軍節度使張從賓爲涇州節度使並加檢校太傅以捧聖左右廂都指揮使欽州刺史朱洪實爲寧國軍節度使

加檢校太保充侍衛馬軍都指揮使以嚴衛左右廂都
指揮使巖州刺史皇甫遇爲忠正軍節度使檢校太保
充侍衛步軍都揮使戊子樞密使檢校太尉同平章事
朱弘昭樞密使檢校太尉同中書門下二品馮贇並加
兼中書令北京留守河東節度使兼大同彰國振武威
塞等軍蕃漢馬步總管石敬瑭加兼中書令幽州節度
使檢校太尉兼中書令趙德鈞加檢校太師兼中書令
樞密使馮贇表堅讓中書令制改兼侍中封邠國公庚
寅鳳翔節度使潞王從珂加兼侍中青州節度使檢校
太尉兼中書令房知溫加檢校太師辛卯以翰林學士

承旨尙書右丞李懌爲工部尙書以秘書監盧文紀爲
太常卿充山陵禮儀使王辰荆南節度使檢校太尉兼
中書令高從誨封南平王湖南節度使檢校太尉兼中
書令馬希範封楚王甲午兩浙節度使檢校太師守中
書令吳王錢元瓘進封吳越王前洺州團練使皇甫立
加檢校太保充鄜州節度使前彰義軍節度使康福加
檢校太傅充邠州節度使劔南東西兩川節度使檢校
太尉兼中書令蜀王孟知祥加檢校太師制下知祥辭
不受命丙申鎮州節度使檢校太尉兼侍中范延光汴
州節度使檢校太尉兼侍中趙延壽並加檢校太師戊

戊山南西道節度使檢校太傅同平章事張虔釗襄州
節度使趙在禮並加檢校太尉辛丑以振武軍節度使
安北都護楊檀兼大同彰國振武威塞等軍都虞候充
北面馬軍都指揮使閏月壬寅朔羣臣赴西宮臨癸卯
御文明殿入閣以前右僕射權知河南府事盧質爲太
子少傅兼河南尹以諫議大夫唐汭膳部郎中知制誥
陳乂並爲給事中充樞密院直學士通鑑汭以文學從
帝歷三鎮在幕府
及卽位將佐之有才者朱馮皆斥逐之汭性迂疎朱馮
恐帝含怒有時而發乃引汭于密近以其黨陳乂監之
宣徽南院使驃騎大將軍左衛上將軍知內侍省孟漢
瓊加開府儀同三司賜忠貞扶運保泰功臣丙午正衙

命使冊皇太后曹氏戊申以前雄武軍節度使劉仲殷
爲右衛上將軍邢州節度使趙鳳加爵邑自是諸藩鎮
文武臣寮皆次第加恩帝嗣位覃恩澤也以翰林學士
中書舍人崔悅爲工部侍郎依前充職以給事中張鵬
爲御史中丞以御史中丞龍敏爲兵部侍郎以太僕少
卿竇維爲大理卿甲寅正衙命使冊皇太妃王氏集賢
院上言準敕書修創凌烟閣尋奉詔問閣高下等級謹
按凌烟閣都長安時在西內三清殿側畫像皆北面閣
中有隔隔內面北寫功高宰輔南面寫功高諸侯王隔
外面次第圖畫功臣題贊自西京板蕩四十餘年舊日

主掌官吏及畫像工人並已淪喪集賢院所管寫真官
畫真官人數不少都洛後廢職今將起閣望先定佐命
功臣人數請下翰林院預令寫真本及下將作監興功
次序間架修建乃詔集賢御書院復置寫真官畫真官
各一員餘依所奏丁巳安州奏此月七日夜節度使符
彥超爲部曲王希全所害廢朝一日戊午以前振武軍
節度使安北都護高行周爲彰武節度使辛酉以前鄆
州口使范政爲少府監丙寅幸至德宮車駕至興教門
有飛鳶自空而墜疆于御前是日大風晦冥二月乙亥
以前鎮州節度使涇王從敏爲宋州節度使已卯以前

徐州節度使檢校太傅李敬周爲安州節度使是日宣授鳳翔節度使潞王從珂爲權北京留守以北京留守石敬瑭權知鎮州軍州事以鎮州范延光權知鄴都留守事以前河中節度使洋王從璋權知鳳翔軍軍府事庚寅幸山陵工作所是日西京留守王思同奏鳳翔節度使潞王從珂拒命丁酉王思同加同平章事充西面行營都部署以前邠州節度使藥彥稠爲副部署以河中節度使安彥威爲西面兵馬都監以前定州節度使李德琬爲權北京留守山陵使奏伏覩御札皇帝親奉靈駕至園陵伏見累朝故事人君無親送葬之儀請車

駕不行不從乙未樞密使馮贄起復視事時贄丁母憂

也已亥以司農卿張鎰爲殿中監庚子殿直楚匡祚上

言

案原本避宋諱作楚祚今從通鑑增匡字

監取亳州團練使李重吉至宋

州繫於軍院重吉潞王之長子及幽于宋州帝猶以金

帛賜之及聞西師咸叛方遣使殺之三月甲辰以前太

僕少卿魏仁鑄爲太僕卿興元節度使張虔釗奏會合

討鳳翔丙午以右領衛上將軍武延翰爲郢州刺史丁

未洋州孫漢韶奏至興元與張虔釗同議進軍已酉以

鎮州節度使范延光依前檢校太師兼侍中行興唐尹

充天雄軍節度使北面水陸轉運制置使以北京留守

河東節度使石敬瑭依前檢校太尉兼中書令其眞定
尹充鎮州節度使大同彰國振武威塞等軍蕃漢馬步
總管如故辛亥以前定州節度使李德琬爲北京留守
充河東節度使許王從益加檢校太保前河中節度使
洋王從璋加檢校太傅詔藩侯帶平章事以上薨許立
神道碑差官撰文未帶平章事及刺史準令式合立碑
者具文任自製撰不在奏聞乙卯興元張虔劄奏自鎮
將兵赴鳳翔收大散關宗正寺奏準故事諸陵有令丞
各一員近例更委本縣令兼之緣河南洛陽是京邑兼
令丞不便詔特置陵臺令丞各一員乙未以前金吾大

將軍李肅爲左衛上將軍充山陵修奉上下宮都部署
庚申西面步軍都監王景從等自軍前至奏今月十五
日大軍進攻鳳翔十六日嚴衛右廂都指揮使尹暉引
軍東面入城右羽林都指揮使楊思權引軍西面入城
山南軍潰帝聞之謂康義誠等曰朕幼年嗣位委政大
臣兄弟之間必無榛梗諸公大計見告朕獨難違事至
于此何方轉禍朕當與左右自往鳳翔迎兄主社稷朕
自歸藩於理爲便朱弘昭馮贇不對義誠曰西師驚潰
蓋由主將失策今駕下甲兵尙多臣請自往關西振其
兵威扼其衝要義誠累奏請行帝召侍衛都將以下宣

曰先皇帝棄萬國朕于兄弟之中無心爭立一旦被召
主喪便委社稷岐陽兄長果致猜嫌卿等頃從先朝干
征萬戰今日之事寧不痛心今據府庫悉以頒賜卿等
勉之乃出銀絹錢厚賜于諸軍是時方事山陵復有此
賜府藏爲之一空軍士猶負賞物揚言于路曰到鳳翔
更請一分其驕誕無畏如是辛酉幸左藏庫視給將士
金帛是日誅馬軍都指揮使朱弘實坐與康義誠忿爭
故也癸亥以康義誠爲鳳翔行營都詔討使餘如故以
王思同爲副詔討使以安從進爲順化軍節度使充侍
衛馬軍都指揮使詔左右羽林軍四十指揮改爲嚴衛

左右龍武神武軍改爲捧聖甲子陝州奏潞王至潼關
害西面都部署王思同乙亥宣諭西面行營將士俟平
鳳翔日人賞二百千府庫不足以宮闈服翫增給詔侍
衛馬軍都指揮使安從進京城巡檢是日從進已得潞
王書檄潛布腹心矣丁卯潞王至陝州戊辰帝急召孟
漢瓊不至召朱弘昭弘昭懼投于井安從進尋殺馮贇
于其第是夜帝以百騎出玄武門案契丹國志愍帝領五十騎自隨出奔衛
州與薛史異謂控鶴指揮使慕容遷曰爾誠有馬控鶴從予
及駕出卽闔門不行遷乃帝素親信者也臨危如是人
皆惡之是月二十九日夜帝至衛州東七八里遇騎從

自東來不避左右叱之乃曰鎮州節度使石敬瑭也帝
喜敬瑭拜舞于路帝下馬慟哭諭以潞王危社稷康義
誠以下叛我無以自庇長公主見教逆爾于路謀社稷
大計敬瑭曰衛州王宏贄宿舊諳事且就宏贄圖之敬
瑭卽馳騎而前見宏贄曰主上播遷至此危迫吾戚屬
也何以圖全弘贄曰天子避寇古亦有之然于奔迫之
中亦有將相國寶法物所以軍長瞻奉不覺其亡也今
宰執近臣從乎寶玉法物從乎詢之無有弘贄曰大樹
將顛非一繩所維今以五十騎奔竄無將相一人擁從
安能興復大計所謂蛟龍失雲雨者也今六軍將士總

在潞邸矣公總以戚藩念舊無奈之何遂與弘贄同謁于郵亭宣坐謀之敬瑭以弘贄所陳以聞弓箭庫使沙守榮賁洪進前謂敬瑭曰主上卽明宗愛子公卽明宗愛婿富貴旣同受休戚合共之今謀于戚藩欲期安復反索從臣國寶欲以此爲辭爲賊算天子耶乃抽佩刀刺敬瑭敬瑭親將陳暉扞之守榮與暉單戰而死洪進亦自刎是日敬瑭盡誅帝之從騎五十餘輩獨留帝于駟乃馳騎趨洛四月三日潞王入洛五日卽位七日廢帝爲鄂王遣弘贄子殿直王巒之衛州時弘贄已奉帝幸州廨九日巒至帝遇鳩而崩時年二十一

案契丹國志王巒至

衛州進鴆于愍帝愍帝不飲薛縉殺之與薛史異歐陽史同薛史

皇后孔氏與其四子

並遇害晉高祖卽位諡曰閔與秦王及末帝子重吉並

葬于徽陵域中封纔數尺路人觀者悲之

永樂大典卷七千一百七

四十

史臣曰閔帝爰自冲年素有令問及徵從代邸入踐堯

階屬軒皇之弓劍初遺吳王之几杖未賜遽生猜間遂

至奔亡蓋輔臣無安國之謀非少主有不君之咎以至

越在草莽失守宗祧斯蓋天命之難諶士德之將謝故

也

永樂大典卷七千一百七十四

舊五代史卷四十五終

舊五代史卷四十五攷證

唐閔帝紀閔帝諱從厚小字菩薩奴明宗第三子也

案歐陽史作明宗第五子吳縝嘗辨其誤今攷五代會要亦作第三子與是書同

十二月癸卯朔 案五代春秋作癸亥朔蓋傳寫之訛
歐陽史通鑑俱從是書作癸卯

節度使符彥超爲部曲王希全所害 案彥超被害通鑑從是書作閏月五代春秋繫于正月殊誤

丁酉王思同加同平章事充西面行營都部署以前邠州節度使藥彥稠爲副部署 案歐陽史辛卯西京

留守王思同爲西面行營都部署靜難軍節度使藥
彥稠爲副是書作丁酉與歐陽史異據通鑑則思同
以辛卯充都部署丁酉加同平章也蓋采薛歐二史
而兼用之

殿直楚匡祚上言 楚匡祚原本作楚祚今從通鑑增
匡字

陝州奏潞王至潼關害西面都部署王思同 歐陽史
作思同奔歸于京師死之與是書異

是夜帝以百騎出元武門 案契丹國志愍帝領五十
騎自隨出奔衛州宋史李洪信傳又作少帝東奔捧

聖軍數百騎從行與是書異據下文王宏贇曰今以五十餘騎奔竄則作五十騎者是也

舊五代史卷四十五攷證

舊五代史卷四十六

宋司空同中書門下平章事薛居正等撰

末帝紀上

唐書二十二

末帝諱從珂本姓王氏鎮州人也母宣憲皇后魏氏以光啟元年歲在己巳正月二十三日生帝于平山景福中明宗爲武皇騎將略地至平山遇魏氏虜之帝時年

十餘歲明宗養爲己子

案通鑑考異引唐廢帝實錄云廢帝諱從珂明宗之元子也母

日宣憲皇后魏氏鎮州平山人中和末明宗徇地山東留宿平山得魏后帝以光啟元年正月二十三日生于外舍屬用兵不息音問阻絕帝甫十歲方得歸宗今考五代會要歐陽史諸書皆作養子惟實錄作元子疑因太后令稱爲皇長子而傳會也通鑑仍從薛史小字二十三帝幼謹重寡言及

壯長七尺餘方頤大體材貌雄偉以驍果稱明宗甚愛之在太原嘗與石敬瑭因擊毬同入于趙襄子之廟見其塑像屹然起立帝秘之私心自負及從明宗征討以力戰知名莊宗嘗曰阿三不惟與我同齒敢戰亦相類莊宗與梁軍戰于胡柳陂兩軍俱撓帝衛莊宗奪土山摧驍陣其軍復振時明宗先渡河莊宗不悅謂明宗曰公當爲吾死渡河安往明宗待罪莊宗以帝從戰有功由是解慍天祐十八年莊宗營于河上議討鎮州留守符存審在德勝砦未行梁人謂莊宗已北乃悉眾攻德勝莊宗命明宗存審爲兩翼以抗之自以中軍前進梁

軍退却帝以十數騎雜梁軍而退至壘門大呼斬首數級斧其望櫓而還莊宗大噱曰壯哉阿三賜酒一器同光元年四月從明宗襲破鄆州九月莊宗敗梁將王彥章于中都急趨汴州明宗將前軍帝率勁騎以從晝夜兼行卒先下汴城莊宗勞明宗曰復唐社稷卿父子之功也二年以帝爲衛州刺史時有王安節者昭宗朝相杜讓能之宅吏也安節少善賈得相術于奇士因事見帝于私邸退謂人曰眞北方天王相也位當爲天子終則我莫知也三年明宗奉詔北禦契丹以家在太原表帝爲北京內衛指揮使莊宗不悅以帝爲突騎都指揮

使遣戍石門四年魏州軍亂明宗赴洛時帝在橫水率部下軍士由曲陽孟縣趨常山與王建立會倍道兼行渡河而南由是明宗軍聲大振天成初以帝爲河中節度使明年二月加檢校太保同平章事十一月加檢校太傅長興元年加檢校太尉先是帝與樞密使安重誨在常山因杯盤失意帝以拳擊重誨腦中其櫛走而獲免帝雖悔謝然重誨終銜之及帝鎮河中重誨知其出入不時因矯宣中旨令牙將楊彥溫遇出郭則閉門勿納是歲四月五日帝閱馬于黃龍莊彥溫閉城拒帝帝聞難遽還遣問其故彥溫曰但請相公入朝此城不可

人也帝止虞鄉以聞明宗詔帝歸闕遣藥彥稠將兵討
彥溫令生致之面要鞠問十一月收城彥溫已死明宗
以彥稠不能生致彥溫甚怒之後數日安重誨以帝失
守諷宰相論奏行法明宗不悅重誨又自論奏明宗曰
朕爲小將校時家徒衣食不足賴此兒荷石灰收馬糞
存養以至今貴爲天子而不能庇一兒卿欲行朝典朕
未曉其義卿等可速退從他私第閑坐遂詔歸清化里
第不預朝請帝尙懼重誨多方危陷但日諷佛書陰禱
而已二年安重誨得罪帝卽授左衛大將軍未幾復檢
校太傅同平章事行京兆尹充西京留守三年進位太

尉移鳳翔節度使四年五月封潞王閔帝卽位加兼侍
中旣而帝子重吉出刺亳州女尼入宮帝方憂不測應
順元年二月移帝鎮太原是時不降制書唯以宣授而
已帝聞之召賓佐將吏以謀之皆曰主上年幼未親庶
事軍國大政悉委朱弘昭等王必無保全之理判官馬
裔孫曰君命召不俟駕行焉諸君凶言非合圖也是夜
帝令李專美草檄求援諸道欲誅君側之惡朝廷命王
思同率師來討三月十五日外兵大集九國志李彥琦傳潞王守岐下
諸道將急攻其壘彥琦時在園中罄家財以給軍用十六日大將督眾攻城帝登
城垂泣諭于外曰我年未二十從先帝征伐出生入死

金瘡滿身樹立得社稷軍士從我登陣者多矣今朝廷信任賊臣殘害骨肉且我有何罪因慟哭聞者哀之時羽林都指揮使楊思權謂眾曰大相公吾主也遂引軍自西門入嚴衛都指揮使尹暉亦引軍自東門而入外軍悉潰十七日率居民家財以賞軍士是日帝整眾而東二十日次長安副留守劉遂雍以城降率京兆居民家財犒軍二十三日次靈口誅王思同二十四日次華州收藥彥稠繫獄二十五日次閬鄉王仲臯父子迎謁命誅之二十六日次靈寶河中節度使安彥威來降待罪宥之遣歸鎮陝州節度使康思立奉迎二十七日次

陝州下令告諭京城二十八日康義誠軍前兵士相繼
來降義誠詣軍門請罪帝宥之駕下諸軍畢至誅宣徽
南院使孟漢瓊于路左是夜閱帝與帳下親騎百餘出
元武門而去夏四月壬申帝至蔣橋文武百官立班奉
迎教旨以未拜梓宮未可相見俟會于至德宮時六軍
勳臣及節將內職已累表勸進是日帝入謁太后太妃
至西宮伏梓宮慟哭宰相與百寮班見致拜帝荅拜馮
道等上牋勸進帝立謂羣臣曰予之此行事非獲已當
俟主上歸闕園陵禮終退守藩服諸公言遽及此信無
謂也衛州刺史王弘贇奏閔帝以前月二十九日至州

癸酉皇太后下令降閔帝爲鄂王又太后令曰先皇帝
誕膺天眷光紹帝圖明誠動于三靈德澤被於四海方
期偃革遽歎遺弓自少主之承祧爲奸臣之擅命猜忌
骨肉離間磐維旣輒易于藩垣復驟興于兵甲遂致輕
離社稷大撓軍民萬世鴻基將墜于地皇長子潞王從
珂位居冢嗣德茂冲年乃武乃文惟忠惟孝前朝廓清
多難有戰伐之大功續紹丕圖有夾輔之盛業今以宗
祧乏祀園寢有期須委親賢俾居監撫免萬機之壅滯
慰兆庶之推崇可起今月四日知軍國事權以書詔印
施行是日監國在至德宮宰臣馮道等率百官班于宮

門待罪帝出于庭曰相公諸人何罪請復位乃退甲戌
太后令曰先皇帝櫛風沐雨平定華夷嗣洪業于艱難
致蒼生于富庶鄂王嗣位奸臣弄權作福作威不誠不
信離間骨肉猜忌磐維鄂王輕捨宗祧不克負荷洪基
大寶危若綴旒須立長君以紹丕構皇長子潞王從珂
日躋孝敬天縱聰明有神武之英姿有寬仁之偉畧先
朝經綸草昧廓靜寰區辛勤有百戰之勞忠貞續一統
之運臣誠子道冠古超今而又克己化民推心撫士率
土之謳歌有屬上蒼之眷命攸臨一日萬機不可以暫
曠九州四海不可以無歸況因山有期同軌斯至永言

嗣守屬任元良宜卽皇帝位乙亥監國赴西宮柩前告
奠卽位攝中書令李愚宣冊書曰維應順元年歲次甲
午四月庚午朔六日乙亥文武百僚特進守司空兼門
下侍郎同中書門下平章事充太微宮使引文館大學
士上柱國始平郡公食邑二千五百戶臣馮道等九千
五百九十三人上言帝王興運天地同符河出圖而洛
出書雲從龍而風從虎莫不恢張八表覆育兆民立大
定之基保無疆之祚人謠再洽天命顯歸須登宸極之
尊以奉祖宗之祀伏惟皇帝陛下天資仁知神助機權
奉莊宗于多難之時從先帝于四征之際凡當決勝無

不成功泊正皇綱每嚴師律爲國家之志大守臣子之道全自泣遺弓常悲易月欲期同軌親赴因山而自鄂王承祧奸臣擅命致神祇之乏享激朝野以歸心使屈者伸令否者泰人情大順天象至明聚東井以呈祥拱北宸而應運由是文武百辟岳牧羣賢至于比屋之倫盡祝當陽之位今則承太后慈旨守先朝遠圖撫四海九州享千齡萬祀臣等不勝大願謹奉寶冊稟太后令奉皇帝踐祚臣等誠慶誠忭謹言帝就殿之東楹受羣臣稱賀先是帝在鳳翔日有瞽者張濛自言知術數事太白山神其神祠卽元魏時崔浩廟也時之否泰人之

休咎濛告于神卽傳吉凶之言帝親校房髡酷信之一日濛至府聞帝語聲駭然曰非人臣也髡詢其事卽傳神語曰三珠并一珠驢馬没人驅歲月甲庚午中興戊己土髡請解釋曰神言予不知也長興四年五月府廨諸門無故自動人頗駭異遣髡問濛曰衙署小異勿怪不出三日當有恩命至是夜報至封潞王及帝移鎮河東甚懼問濛濛曰王保無患王思同兵至又詰之濛曰王有天下不能獨力朝廷兵來迎王也王若疑臣臣惟一子請致之麾下以質臣心帝乃以濛攝館驛巡官至是帝受冊冊曰維應順元年歲次甲午四月庚午朔帝

回視房曷曰張濛神言甲庚午不亦異乎帝令曷共術士解三珠一珠事言三珠三帝也驢馬没人驅失位也帝卽位之後以濛爲將作少監同正仍賜金紫以酬之帝初封潞王言事者云潞字一足己入洛矣

案原本作一足己入

潞矣今據冊府元龜改正

又帝在鳳翔日有何叟者年踰七十暴卒

見陰官憑几告叟曰爲我言于潞王來年三月當爲天子二十三年叟旣甦懼不敢言逾月復卒陰官見而叱之曰安得違吾旨不達其事再放汝還退見廊廡下簿書以問主者曰朝代將易此卽昇降人爵之籍也及甦詣帝親校劉延朗告之帝召而問之叟曰請質之此言

無徵戮之可也後人云二十三蓋帝之小字也又石濠人胡杲通善天文帝召問之曰王貴不可言若舉動宜以乙未年及舉兵又問之杲通曰今歲蒞首王者不宜建功立事若俟來歲入朝則福祚永遠矣其後皆驗夫如是則大寶之位必有冥數可輕道哉丙子詔河南府率京城居民之財以助賞軍丁丑又詔預借居民五個月房課不問士庶一槩施行帝素輕財好施自岐山爲諸軍推戴告軍士曰候入洛人賞百千至是以府藏空匱于是有配率之令京城庶士自絕者相繼己卯衛州奏此月九日鄂王薨庚辰以宰臣劉昫判三司辛己邢

州奏磁州刺史宋令詢自經而卒令詢鄂王在藩時都
押牙也故至于是甲申帝以鄂王薨行服于內園羣臣
奉慰癸未太后太妃出宮中衣服器用以助賞軍乙酉
帝服衮冕御明堂殿文武百僚朝服就位宣制改應順
元年爲清泰元年大赦天下常赦不原者咸赦除之丁
亥以宣徽北院使郝瓊爲宣徽南院使權判樞密院以
前三司使王玫爲宣徽北院使以隨駕牙將宋審虔爲
皇城使劉延朗爲莊宅使鳳翔節度判官韓昭裔爲左
諫議大夫充端明殿學士觀察判官馬裔孫爲翰林學
士掌書記李專美爲樞密院直學士戊子侍衛親軍都

指揮使康義誠伏誅是日詔曰樞密使朱弘昭馮贇宣
徽南院使孟漢瓊西京留守王思同前邠州節度使藥
彥稠共相朋煽妄舉干戈互興離間之謀幾構傾亡之
禍宜行顯戮以快羣情仍削奪官爵云庚寅鳳翔奏西
川孟知祥僭稱大蜀年號明德有司上言皇帝以五月
朔日御明堂殿受朝三日夏至祀皇地祇前二日奏告
獻祖室不坐比正旦冬至是日有祀事則次日受朝今
祀在五鼓前質明行禮畢御殿在旦後請比例行之詔
日日出御殿舉祀事無妨宜依常年例史館奏凡書詔
及處分公事臣下奏議望令近臣錄付當館詔端明殿

學士韓昭裔樞密直學士李專美錄送辛卯以左諫議

大夫盧損爲右散騎常侍壬辰詔賜禁軍及鳳翔城下

歸明將校錢帛各有差

通鑑云禁軍在鳳翔歸命者自楊思權尹暉等各賜二馬一駝

錢七十緡下至軍人錢二十緡其在京者各十緡

初帝離岐山諸軍皆望以不

次之賞及從至京師不滿所望相與謠曰去卻生菩薩

扶起一條鐵其無厭如此

案通鑑作除去菩薩扶立生鐵胡三省注云閔帝小字菩薩

丙申葬明宗皇帝于徽陵丁酉奉神主于太廟戊戌

山陵使司空兼門下侍郎平章事馮道上表納政不允

五月庚子朔御文明殿受朝賀乙巳以左龍武指揮使

安審琦爲左右捧聖都指揮使以右千牛上將軍符彥

饒爲左右嚴衛都指揮使丙午以端明殿學士韓昭裔爲樞密使以莊宅使劉延朗爲樞密副使以權知樞密事房嵩爲宣徽北院使以成德軍節度使大同彰國振武威塞等軍蕃漢馬步都部署檢校太尉兼中書令駙馬都尉石敬瑭爲北京留守河東節度使加檢校太師兼中書令都部署如故汴州節度使檢校太師兼侍中駙馬都尉趙延壽進封魯國公戊申中書門下奏太常禮院狀明宗以此月二十日祈廟宰臣攝太尉行事緣馮道在假李愚十八日私忌在致齋內劉昫又奏判三司免祀事詔禮官參酌有司上言李愚私忌在致齋內

諸私忌日遇大朝會入閣宣召皆赴朝參今祠廟事大

忌日屬私請比大朝會宣召例

案五代會要載此奏下有差李愚從事五字薛

史刪

去從之以陝州節度使康思立爲邢州節度使以同

州節度使安重霸爲西京留守以羽林右第一軍都指

揮使春州刺史楊思權爲邠州節度使己酉左監門衛

將軍孔知鄴右驍衛將軍華光裔並勒停見任時差知

鄴應州告廟稱疾辭命改差光裔復稱馬墜傷足故俱

罷之庚戌以司空兼門下侍郎平章事馮道爲檢校太

尉同平章事充同州節度使以天雄軍節度使范延光

爲樞密使封齊國公鄆州節度使李從曠爲鳳翔節度

使辛亥以嚴衛都指揮使尹暉爲齊州防禦使甲寅以
侍衛馬軍都指揮順化軍節度使安從進爲河陽節度
使典軍如故太常卿盧文紀奏明宗一室酌獻舞曲請
名雍熙之舞從之丁巳以皇子銀青光祿大夫檢校工
部尙書重美爲檢校司徒守左衛上將軍自是諸道節
度使刺史文武臣僚相繼加檢校官或階爵封邑以帝
登位覃慶也戊午以隴州防禦使相里金爲陝州節度
使初帝以檄書告藩鄰唯金遣判官薛文遇往來計事
故以節鎮獎之宣徽北院使檢校工部尙書房曷加檢
校司空行左威衛大將軍事如故以樞密使左諫議大

夫韓昭裔爲刑部尙書使如故己未太白晝見以樞密副使劉延朗爲左領軍大將軍職如故庚申左僕射門下侍郎平章事監修國史李愚加特進充太微宮使弘文館大學士餘如故中書侍郎兼吏部尙書同平章事集賢院大學士判三司劉昫加門下侍郎兼吏部尙書平章事監修國史判三司癸亥秦州奏西川孟知祥出軍迫陷成州以宣徽南院使右驍衛大將軍郝瓊爲左驍衛上將軍職如故以前義州刺史張承祐爲武勝軍留後戊辰以前右龍武統軍王景戡爲右驍衛上將軍六月庚午朔改侍衛捧聖軍爲彰聖改嚴衛軍爲甯衛

壬申封吳岳成德公爲靈應王禮秩同五岳帝初起遣使祭岳以求祐及登祚故有是報幽州節度使趙德鈞進封北平王青州節度使房知溫進封東平王癸酉以前鄜州節度使索自通爲右龍武統軍甲戌皇子左衛上將軍重美加檢校太保同平章事充鎮州節度使兼河南尹判六軍諸衛事丁丑詔天下見禁罪人委所在長吏躬親慮問疾速疏決庚辰幸至德宮因幸房知溫安元信范延光索自通李從敏第壬午以檢校太子太傅致仕王建立爲檢校太尉兼侍中鄆州節度使以前宋州節度使安元信爲檢校太尉兼侍中潞州節度使

癸未三司使劉昫奏天下戶民自天成二年括定秋夏田稅迄今八年近者相次有百姓詣闕訴田不均累行蠲放漸失稅額望差朝臣一槩檢視不報甲申帝爲故皇子亳州刺史重吉皇長女尼惠明大師幼澄舉哀行服羣臣詣閤門奉慰帝起兵之始重吉幼澄俱爲閔帝所害乙酉以戶部侍郎韓彥恂爲絳州刺史以左武衛上將軍李肅爲單州刺史丙戌襄州節度使趙在禮加同平章事甲午以武勝軍留後張承祐爲華州節度使以皇城使宋審虔爲壽州節度使充侍衛步軍都指揮使以右衛上將軍劉仲殷爲宋州節度使以侍衛步軍

都指揮使壽州節度使皇甫遇爲鄧州節度使以前華
州節度使華溫琪爲太子太傅致仕丁酉左神武統軍
周知裕卒贈太傅是月京師大旱熱甚暍死者百餘人
秋七月庚子太子少保致仕崔沂卒癸卯鳳翔進僞蜀
孟知祥來書稱大蜀皇帝獻書于大唐皇帝且言見迫
羣情以今年四月十二日卽皇帝位云帝不荅以前武
州刺史鄭琮爲右衛上將軍甲辰幸龍門佛寺禱雨乙
巳皇子故亳州團練使重吉贈太尉仍于宋州置廟丁
未鳳翔節度使李從曦封西平王是日宰臣李愚劉昫
因論公事于政事堂相詬辭甚鄙惡帝令樞密副使劉

延朗宣諭曰卿等輔弼之臣不宜如是今後不得更然
辛亥以太常卿盧文紀爲中書侍郎平章事是日中書
門下三上章請立中宮從之丁巳制立沛國夫人劉氏
爲皇后庚申太子少傅陳臯卒乙丑史官張昭遠以所
撰莊宗朝列傳三十卷上之八月庚午詔蠲放長興四
年十二月以前天下所欠殘稅辛未以前尙書左丞姚
顗爲中書侍郎平章事詔應曾受御署官逐攝同一任
正官依期限赴選按徐無黨五代史注云御署官疑是
廢帝初舉兵時所置之官以其非吏
部正授故須荆南秦僞蜀孟知祥卒其子昶嗣僞位壬
申以尙書禮部侍郎鄭韜光爲刑部侍郎以前工部侍

郎楊凝式爲禮部侍郎甲戌以前金州防禦使婁繼英
爲右神武統軍以右神武統軍高允貞爲左神武統軍
乙亥以翰林學士承旨工部尙書知制誥李憐爲太常
卿以翰林學士戶部侍郎知制誥程遜爲學士承旨甲
申以兵部侍郎龍敏爲吏部侍郎以秘書監崔居儉爲
工部尙書乙酉以右武衛上將軍張繼祚爲右衛上將
軍以右驍衛上將軍王景戡爲右衛上將軍以右領衛
上將軍劉衛爲左武衛上將軍以右千牛上將軍王陟
爲右領軍上將軍以司農卿兼通事舍人判四方館事
王景崇爲鴻臚卿依前通事舍人判四方館丁亥右龍

武統軍索自通卒辛卯禮部尙書致仕李光憲卒甲午
以太子少傅盧質爲太子少師乙未以前邢州節度使
趙鳳爲太子太保詔文武百官差使宜合依倫次中書
置簿不得重疊若當使者自緣有事或不欲行者注簿
便當一使自長興三年正月後已曾奉使者便爲簿首
已後差者次第注之有司上言皇后受冊內外命婦上
牋無荅教從之丙申御文明殿冊皇后命使攝太尉宰
臣盧文紀使副攝司徒右諫議大夫盧損詣皇后宮行
禮畢恩賜有差九月己亥以久雨分命朝臣祭都城門
告宗廟社稷辛丑夜有星如五斗器西南流尾迹長數

丈屈曲如龍形又眾星亂流不可勝數京師大雨雹如彈丸曹州刺史藥縱之卒甲辰以霖霪甚詔都下諸獄委御史臺憲錄問諸州縣差判官令錄親自錄問晝時疏理壬子中書門下舉行長興三年勅常年薦送舉人州郡行鄉飲酒之時帖太常草定儀注奏聞甲寅以前潞州節度使檢校太尉同平章事盧文進爲安州節度使己未雲州奏契丹寇境冬十月辛未有雉金色止于中書政事堂中書門下奏請以正月二十三日皇帝誕慶日爲千春節從之戊寅宰臣李愚劉昫罷相以愚守左僕射昫守右僕射契丹寇雲應州詔河東節度使石

敬瑭率兵屯代州戊子宰臣姚顗奏吏部三銓近年併爲一司望令依舊分銓從之辛丑以左衛上將軍李宏元卒廢朝贈司徒癸巳以禮部郎中知制誥呂琦守本官充樞密院直學士十一月辛丑以刑部侍郎鄭韜光爲尙書右丞以光祿少卿烏昭遠爲少府監秦州節度使張延朗奏率師伐蜀中書門下奏二十六日明宗忌陛下初遇忌辰不同常歲請于忌辰前後各一日不坐朝從之御史臺奏前任節度使刺史行軍副使雖每日于便殿起居每遇五日起居亦合綴班從之丙午以前興州刺史馮暉配同州衙前安置暉爲興州刺史屯乾

渠蜀人來侵暉自屯所奔歸鳳翔故有是責丁未詔振武新州河東西北邊經契丹蹂踐處放免三年兩稅差配時契丹初退故也癸丑以前華州節度使王萬榮爲左驍衛上將軍致仕甲寅以振武節度使楊光遠充大彰國振武威塞等軍兵馬都虞候以前右金吾大將軍穆延暉爲右武衛上將軍壬戌以禮部侍郎楊凝式爲戶部侍郎甲子以中書舍人盧導爲禮部侍郎十二月丁卯朔詔修奉本朝諸帝陵寢己巳以北面馬軍都指揮使易州刺史安叔千爲安北都護振武節度使以齊州防禦使尹暉爲彰國軍節度使庚午詔葬庶人從

榮有司上言依貞觀中庶人承乾以公禮葬從之乙亥
以秦州節度使張延朗爲中書侍郎同平章事判三司
以中書侍郎平章事盧文紀爲門下侍郎平章事監修
國史以中書侍郎平章事姚顗兼集賢殿大學士以前
邠州節度使康福爲秦州節度使丙戌夜有白氣東西
亘天庚寅幸龍門祈雪自九月至是無雨雪故也

永樂大典

卷一千七
百七十四

舊五代史卷四十六終

舊五代史卷四十六攷證

二十三日次靈口 靈口通鑑唐紀作零口攷冊府元龜亦作靈口今仍其舊

二十七日次陝州 案歐陽史作己巳次陝州是書閔帝紀作丁卯通鑑從是書

夏四月壬申帝至蔣橋文武百官立班奉迎 案通鑑四月庚午朔太后令內諸司至乾壕迎潞王攷異引廢帝實錄作三月三十日

癸酉皇太后下令降閔帝爲鄂王 案通鑑攷異引閔帝實錄七日廢帝爲鄂王廢帝實錄作癸酉薛歐二

史從廢帝實錄

潞字一足已入洛矣 洛原本訛潞今據冊府元龜改

正

甲申 案甲申疑當作壬午以下文當作癸未也

補前本紀劉昉又奏判三司免祀事 五代會要清泰元年宰相劉昉奏中書以近敕

祠祭行事官致齋內唯祀事得行其餘悉斷又宰臣行事致齋內不押班不赴內殿起居不知印臣緣判

三司公事其祀事國忌行香伏乞特免從之

補前本紀及登祚故有是報 五代會要載中書門下奏天寶十載正月封吳山爲成德公與

沂山會稽醫巫閭同封至德二載十二月改吳山爲岳祠亭官屬一同五岳今國家以祈禱靈應宜示殊

禮臣等商量請加封爲靈應王從之

補前

張延朗爲中書侍郎同平章事判三司

五代會要
二年三月

宰臣張延朗奏臣判三司公事每日內殿祇候其合綴前班押班伏乞特免從之

舊五代史卷四十六攷證

舊五代史卷四十七

宋司空同中書門下平章事薛居正等撰

末帝紀中

唐書二十三

清泰二年春正月丙申朔帝御明堂殿受朝賀仗衛如式乙巳中書門下奏遇千春節凡刑獄公事奏覆候次月施行今後請重繫者卽候次月輕繫者卽節前奏覆決遣從之戊申宗正寺奏北京應州曹州諸陵望差本州府長官朝拜案五代會要載宗正寺原奏云北京永興長寧建極三陵應州遂衍奕三陵准曹州溫陵例下本州府官朝拜是曹州先以府官朝拜北京應州後從其例也薛史刪併原文似未分晰雍坤和徽四陵差太常宗正卿朝拜從之己酉北京奏光

祿卿致仕周元豹卒庚申鄴都進天王甲帝在藩時有相士言帝如毗沙天王帝知之竊喜及卽位選軍士之魁偉者被以天王甲俾居宿衛因詔諸道造此甲而進之三司奏添徵蠶鹽錢及增麴價先是麴斤八十文增至一百五十文乙丑雲州節度使張溫移鎮晉州以西京留守安重霸爲雲州節度使二月庚午定州節度使兗王從溫移鎮兗州振武節度使楊檀移鎮定州兼北面行營馬步都虞候甲戌以安州節度使李周爲京兆尹充西京留守以樞密使天雄軍節度使范延光爲檢校太師兼中書令充汴州節度使皇子鎮州節度使兼

河南尹判六軍諸衛事左右街坊使重美加檢校太尉
同平章事充天雄軍節度使餘如故辛己以右諫議大
夫盧損爲御史中丞以御史中丞張鵬爲刑部侍郎王
午寧遠軍節度使馬存加兼侍中鎮南軍節度使馬希
振加兼中書令詔順義軍節度使姚彥璋加兼侍中己
丑宰臣盧文紀等上皇妣魯國太夫人尊諡曰宣憲皇
太后請擇日冊命從之三月戊戌故太子太保趙鳳贈
太傅辛丑以前汴州節度使趙延壽爲許州節度使兼
樞密使以夏州行軍司馬李彝殷爲本州節度使兄彝
超卒故也癸卯以靜海軍節度使檢校太師兼中書令

安南都護錢元鈇爲留守太保餘如故丙午以給事中
趙光輔爲右散騎常侍戊申皇妹魏國夫人石氏封晉
國長公主齊國公主趙氏封燕國長公主己酉有司上
言宣憲皇后未及山陵權於舊陵所建廟從之辛亥功
德使奏每年誕節諸州府奏薦僧道其僧尼欲立講論
科講經科表白科文章應制科持念科禪科聲贊科道
士欲立經法科講論科文章應制科表白科聲贊科焚
修科以試其能否從之丙辰以右龍武統軍李德琬爲
涇州節度使庚申以鎮州節度使知軍府事董溫琪爲
鎮州節度使檢校太保壬戌以左右彰聖都指揮使富

州刺史安審琦領楚州順化軍節度使軍職如故審琦受閔帝命西征至鳳翔而降故有是命是月太常丞史在德上疏言事其畧曰朝廷任人率多濫進稱武士者不閑計策雖被堅執銳戰則棄甲窮則背軍稱文士者鮮有藝能多無士行問策謀則杜口作文字則倩人所謂虛設其員枉耗國力逢陛下維新之運是文明革弊之秋臣請應內外所管軍人凡勝衣甲者請宣下本部大將一一考試武藝短長權謀深淺居下位有將才者便拔爲大將居上位無將畧者移之下軍其東班臣寮請內出策題下中書令宰臣面試如下位有大才者便

拔居大位處大位無大才者卽移之下僚其疏大約如此盧文紀等見其奏不悅班行亦多憤排故諫官劉濤楊昭儉等上疏請出在德疏辨可否宣行中書覆奏亦駁其錯誤帝詔學士馬裔孫謂曰史在德語太凶其實難容朕初臨天下須開言路若朝士以言獲罪誰敢言者爾代朕作詔勿加在德之罪詔曰左補闕劉濤等奏太常丞史在德所上章疏中書門下駁奏未奉宣諭乞特施行分明黜陟朕常覽貞觀故事見太宗之治理以貞觀昇平之運太宗明聖之君野無遺賢朝無闕政盡善盡美無得而名而陝縣丞皇甫德參輒上封章恣行

訕謗人臣無禮罪不容誅賴文貞之彌縫恕德參之狂
瞽魏徵奏太宗曰陛下思聞得失只可恣其所陳若所
言不中亦何損于國家朕每思之誠要言也遂得下情
上達德盛業隆太宗之道彌光文貞之節斯著朕惟寡
昧獲奉宗祧業業兢兢懼不克荷思欲率循古道簡拔
時材懷忠抱直之人虛心渴見便佞詭隨之說杜耳惡
聞史在德近所獻陳誠無避忌中書以文字紕繆比類
僭差改易人名觸犯廟諱請歸憲法以示戒懲蓋以中
書旣委參詳合盡事理朕纘承前緒誘勸將來多言數
窮雖聖祖之所戒千慮一得冀愚者之可從因覽文貞

之言遂寬在德之罪已令停寢不遣宣行劉清等官列
諫垣宜陳讜議請定短長之理以行黜陟之文昔魏徵
則請賞德參今濤等請黜在德事同言異何相遠哉將
議允俞恐虧開納方朝廷粗理俊乂畢臻留一在德不
足爲多去一在德未足爲少苟可懲勸朕何憂焉但緣
情在傾輸理難黜責濤等敷奏朕亦優容宜體含弘勉
思竭盡凡百在下悉聽朕言夏四月辛巳宰相判三司
張延朗奏州縣官徵科條格其令錄在任徵科依限了
絕一年加階兩年與試銜三年皆及限了絕與服色攝
任者一年內了絕及攝二年三年內皆及限與眞命其

主簿同縣令條本判官一年加階二年改試銜三年轉官本曹官省限內了絕與試銜諸節級三年內並了絕者與賞錢三十貫其責罰依天成四年五月五日勅施行從之癸未御史中丞盧損等進清泰元年以前十一年制勅堪悠久施行者三百九十四道編爲三十卷其不中選者各令所司封閉不得行用詔其新編勅如可施行付御史臺頒行以宰相盧文紀兼太微宮使弘文館大學士姚顗加門下侍郎監修國史張延朗兼集賢殿大學士以樞密使韓昭裔爲中書侍郎兼兵部尙書平章事充樞密使乙酉以前武勝軍節度使張萬進爲

鄜州節度使辛卯以宣徽南院使劉延皓爲刑部尙書
充樞密使以司天監耿瑗爲太府卿以僞蜀右衛上將
軍胡杲通爲司天監以宣徽北院使房曷爲左衛上將
軍充宣徽南院使以樞密副使劉延朗爲左領軍上將
軍充宣徽北院使兼樞密副使五月丙申新州張武奏
契丹寇境乙巳詔天下見禁囚徒自五月十二日以前
除十惡五逆放火燒舍持杖殺人官典犯贓僞行印信
合造毒藥并見欠省錢外罪無輕重一切釋放庚戌詔
不得貢奉寶裝龍鳳雕鏤刺作組織之物庚戌中書奏
準勅凡廟諱但迴避正文其偏旁文字不在減少點畫

今定州節度使楊檀檀州金壇等名酌情制宜並請改之其表章文案偏旁字闕點畫凡臣寮名涉偏旁亦請改名詔曰偏旁文字音韻懸殊止避正呼不宜全改楊檀賜名光遠餘依舊甲寅以戶部侍郎楊凝式爲秘書監以尙書禮部侍郎盧導爲尙書右丞以尙書右丞鄭韜光爲尙書左丞丙辰以端明殿學士李專美爲兵部侍郎以端明殿學士李崧爲戶部侍郎以翰林學士馬裔孫爲禮部侍郎以禮部郎中充樞密院直學士呂琦爲給事中並充職如故太子少保致仕任圜贈尙書右僕射以順化軍節度使兼彰聖都指揮使北面行營排

陣使安審琦爲邢州節度使庚申以兵部尙書李璘爲太常卿以禮部尙書王權爲戶部尙書以太常卿李懌爲禮部尙書癸亥以六軍諸衛判官給事中張允爲右散騎常侍六月甲子朔新州上言契丹入寇乙丑有司上言宣憲皇太后陵請以順從爲名從之振武奏契丹二萬騎在黑榆林丁卯以太子少保致仕朱漢賓卒廢朝壬申命史館修撰明宗實錄契丹寇應州以新州節度使楊漢賓爲同州節度使以前晉州節度使翟璋爲新州節度使庚辰北面招討使趙德鈞奏行營馬步軍都虞候定州節度使楊光遠行營排陣使邢州節度使

安審琦帥本軍至易州見進軍追襲契丹次河東節度使石敬瑭奏邊軍乏芻糧其安重榮巡邊兵士欲移振武就糧從之尋又奏懷孟租稅請指揮於忻代州輪納朝廷以邊儲不給詔河東戶民積粟處量事抄借仍于鎮州支絹五萬匹送河東充博采之直是月北面轉運副使劉福配鎮州百姓車子一千五百乘運糧至代州時水旱民飢河北諸州困于飛輓逃潰者甚眾軍前使者繼至督促糧運由是生靈咨怨辛巳詔諸州府署醫博士丙戌以前許州節度使李從昶爲右龍武統軍以前彰國軍節度使沙彥珣爲右神武統軍秋七月丙申

石敬瑭奏斬挾馬都指揮使李暉等三十六人以謀亂

故也時石敬瑭以兵屯忻州一日軍士喧噪遽呼萬歲

乃斬暉等以止之

契丹國志契丹屢攻北邊時石敬瑭將大兵屯忻州潞王遣使賜軍士夏

衣傳詔撫諭軍士呼萬歲者數四敬瑭懼幕僚段希堯請誅其倡者敬瑭命劉知遠斬三十六人以殉潞王聞益疑御史中丞盧損奏準天成二年七月勅每月首十

五日入閣罷五日起居臣以爲中甸排仗有勞聖躬請

只以月首入閣五日起居依舊又準天成三年五月長

興二年七月勅許諸州節度使帶使相歲薦寮屬五人

餘薦三人防禦團練使薦二人今乞行釐革又長興二

年八月勅州縣佐官差充馬步判官仍同一任乞行止

絕依舊衙前選補詔曰今後藩臣帶使相許薦三人餘
薦二人直屬京防禦團練使薦一人餘並從之丁酉回
紇可汗仁美遣使貢方物西京弓弩指揮使任漢權奏
六月二十一日與川軍戰于金州之漢陰王師不利其
步下兵士除傷瘼外已至鳳翔先是墊屋鎮將劉贊引
軍入川界爲蜀將全師郁所敗金州都監崔處訥重傷
諸州屯兵潰散金州防禦使馬全節收合州兵固守獲
全以樞密使劉延皓爲天雄軍節度使甲辰以右神武
統軍沙彥珣權知雲州乙巳以徐州節度使張敬達充
北面行營副總管時契丹入邊石敬瑭屢請益兵朝廷

軍士多在北鄙俄聞忻州諸軍呼譟帝不悅乃命敬達
爲北軍之副以減敬瑭之權也丁巳宰臣盧文紀等上
疏其畧曰臣近蒙召對面奉天旨凡軍國庶事利害可
否卿等合盡言者臣等謬處台衡奉行制勅但緣事理
互有區分軍戎不在于職司錢穀非關于局分苟陳異
見卽類侵官況才不濟時識非經遠因五日起居之例
于兩班旅見之時畧獲對歟兼承顧問衛士周環于階
陛庶臣羅列于殿廷四面聚觀十手所指臣等苟欲各
申愚短此時安敢敷陳韓非昔懼于說難孟子亦憂于
言責臣竊奉本朝政事肅宗初平寇難再復寔瀛頗經

涉于艱難尤勤勞于委任每正衙奏事則泛咨訪于羣臣及便殿詢謀則獨對敷于四輔自上元年後于長安東內置延英殿宰臣如有奏議聖旨或有特宣皆于前一日上聞對御之時祇奉冕旒旁無侍衛獻可替否得曲盡于討論捨短從長故無虞于漏洩君臣之際情理坦然伏望聖慈俯循故事或有事關軍國謀繫否臧未果決于聖懷要詢訪于臣輩則請依延英故事前一日傳宣或臣等有所聽聞切關利害難形文字須面敷敷臣等亦依故事前一日請開延英當君臣奏議之時祇請機要臣寮侍立左右兼乞稍霽威嚴恕臣荒拙雖乏

鷹鷂之効庶盡葵藿之心詔曰卿等濟代英才鎮時碩德或締構于興王之日或經綸于繼聖之時鹽梅之任俱崇藥石之言並切請復延英之制以申議政之規而況列聖遺芳皇朝盛事載詳徵引良切歎嘉恭惟五日起居先皇垂範俟百寮之俱退召四輔以獨昇接以溫顏詢其理道計此時作事之意亦昔日延英之流朕叨獲嗣承切思遵守將成其美不爽兼行其五日起居仍令仍舊尋常公事亦可使舉奏聞或事屬機宜理當秘密量事緊慢不限隔日及當日便可于閣門祇候具勝子奏聞請面敷揚卽當盡屏侍臣端居便殿伫聞高議

以慰虛懷朕或要見卿時亦令當時宣召但能務致理
之實何必拘延英之名有事足可以討論有言足可以
陳述宜以沃心爲務勿以逆耳爲虞勉罄謀猷以裨寡
昧帝性仁恕聽納不倦嘗因朝會謂盧文紀等曰朕在
藩時人說唐代爲人主端拱而天下治蓋以外侍將校
內倚謀臣故端拱而事辦朕荷先朝鴻業卿等先朝舊
臣每一相見除承奉外畧無社稷大計一言相救坐視
朕之寡昧其如宗社何文紀等引咎致謝因奏延英故
事故有是詔八月庚午滑州節度使高允韜卒壬申以
右衛上將軍王景戡爲左衛上將軍以右神武統軍婁

繼英爲右衛上將軍已卯以西上閤門使行少府少監兼通事舍人蘇繼顏爲司農卿職如故辛巳以權知雲州右神武統軍沙彥珣爲雲州節度使鄴都殺人賊陳延嗣并母妹妻等並棄市延嗣父子相承與其妹妻于諸州郡誘人殺之而奪其財前後被殺者數百人至是事泄而誅之癸未以前潞州行軍司馬陳元爲將作監以元善醫故有是命丁亥以沼州團練使李彥舜爲義武軍節度使檢校太傅太原奏達靼部族于靈邱安置己丑以太子少保致仕戴思遠卒廢朝庚寅以前兗州節度使楊漢章爲左神武統軍以前邢州節度使康思

立爲右神武統軍潞州奏前雲州節度使安重霸卒九月已亥以河陽節度使侍衛馬軍都指揮使安從進爲襄州節度使以襄州節度使趙在禮爲宋州節度使癸卯以忠正軍節度使侍衛步軍都指揮使宋審虔爲河陽節度使典軍如故己酉禮部貢院奏進士請夜試童子依舊表薦重置明算道舉舉人落第後別取文解五科試紙不用中書印用本司印並從之以宣徽南院使房暉爲刑部尙書充樞密使以宣徽北院使充樞密副使劉延朗爲宣徽南院使充樞密副使丙辰以左僕射李愚卒廢朝冬十月丁卯幸崇道宮甘泉亭己巳以左

衛上將軍李頊爲左領軍上將軍北面行營總管石敬瑭奏自代州歸鎮庚午以晉州節度使張溫卒廢朝甲戌幸趙延壽張延朗第丁丑以端明殿學士兵部侍郎李專美爲秘書監充宣徽北院使庚寅以左諫議大夫唐訥爲左散騎常侍十一月庚子以左驍衛上將軍郝瓊爲左金吾上將軍以光祿卿王玫爲太子賓客以徐州節度使張敬達爲晉州節度使依前充大同振武威塞彰國等軍馬兵副總管丁未以秘書少監丁濟爲太子詹事乙卯以前金州防禦使馬全節爲滄州留後

通鑑

劉延朗欲除全節絳州刺史羣議沸騰帝聞之以爲橫海留後

渤海國遣使朝貢十二

月戊辰禁用鉛錢壬申以中書侍郎兼兵部尙書充樞密使韓昭裔爲檢校司空同平章事充河中節度使甲戌以宗正少卿李延祚爲將作監致仕丁丑故武安軍州節度使累贈太傅劉建峯贈太尉從湖南之請也戊寅太常奏來年正月一日上辛祀昊天上帝于圓丘依禮大祠不朝詔曰祀事在質明前儀仗在日出後事不相妨宜常年受朝壬午以翰林學士承旨戶部侍郎程遂爲兵部侍郎翰林學士工部侍郎崔稅爲戶部侍郎翰林學士中書舍人和凝爲工部侍郎並依前充職乙酉以前秘書監楊凝式爲兵部侍郎己丑以前同州節

度使馮道爲司空以尙書右僕射劉昫爲左僕射以太
子少師盧質爲左僕射以兵部侍郎馬綯兼國子祭酒

永樂大典卷七
千一百七十四

舊五代史卷四十七終

舊五代史卷四十七攷證

唐末帝紀中枉耗國力 枉耗通鑑注引薛史作枉費
攷冊府元龜亦作枉耗今仍其舊

辛卯以宣徽南院使劉延皓爲刑部尙書充樞密使

案劉延皓充樞密使歐陽史作五月與是書繫四月
異通鑑從是書

侍衛步軍都指揮使宋審虔 宋審虔原本脫虔字今
據通鑑增入

渤海國遣使朝貢 案歐陽史作九月乙卯渤海遣使
者來五代會要作十二月渤海遣使列周卿等入朝

舊五代史卷四十七
貢方物俱與是書作十一月異

翰林學士工部侍郎崔稅
崔稅原本訛崔櫓今據歐

陽史改正

舊五代史卷四十七攷證

舊五代史卷四十八

宋司空同中書門下平章事薛居正等撰

末帝紀下

唐書二十四

清泰三年春正月辛卯朔帝御文明殿受朝賀仗衛如式乙未百濟遣使獻方物戊戌幸龍門佛寺祈雪癸卯以給事中充樞密院直學士呂琦爲端明殿學士以六軍諸衛判官尙書工部郎中薛文遇爲樞密院直學士乙巳以上元夜京城張燈帝微行置酒於趙延壽之第丁未皇子河南尹判六軍諸衛事重美封雍王己未以前司農卿王彥銘爲太僕卿二月戊辰吐渾寧朔兩府

留後李可久加檢校司徒可久本姓白氏前朝賜姓庚

午監脩國史姚顗史官張昭遠李祥吳承範等修撰明

宗實錄三十卷上之

五代會要同脩撰官中書舍人張昭遠李祥直館左拾遺吳承範右

拾遺楊昭儉等各頒賚有差

以大理卿竇維爲光祿卿以前許州節

度判官張登爲大理卿丁丑以太常卿李鑄爲兵部尙

書以兵部尙書梁文矩爲太常卿庚辰以前鄜州節度

使皇甫立爲潞州節度使辛巳以前均州刺史仇暉爲

左威衛上將軍保順軍節度使鮑君福加檢校太尉同

平章事丁亥以昭義節度使安元信卒廢朝三日庚子

中書門下奏準閣門分析內外官辭見謝規例諸州判

官軍將進奉到闕舊例門見門辭今後只令朝見依舊
門辭新除諸道判官書記以下無例中謝並放謝放辭
得替到京無例見今後兩使判官許中謝赴任卽門辭
其書記以下並依舊例朝臣文五品武四品以上舊例
中謝其以下無例對謝今請依天成四年正月勅凡升
朝官並許中謝諸道都押衙馬步都指揮虞候鎮將諸
色場院無例謝辭並進膀子放謝放辭得替到闕無例
入見在京鹽麴稅官兩官巡卽許中謝新除令錄並中
謝次日門辭兼有口勅誠文武兩班所差弔祭使及告
廟祠祭只正衙辭不赴內殿諸道進奏官到闕見得假

進勝子門辭從之辛丑權知福建節度使王昶奏節度使王延鈞以去年十月十四日卒是時延鈞父子雖僭竊於閩嶺猶稱藩於朝廷故有是奏甲辰以右神武統軍楊漢章爲彰武軍節度使丙午以翰林學士禮部侍郎馬裔孫爲中書侍郎同平章事丁巳以端明殿學士呂琦爲御史中丞

案通鑑呂琦與李崧建和親契丹之策爲薛文遇所沮改爲御史中丞蓋

疎之也

戊午御史中丞盧損責授右贊善大夫知雜侍御史韋稅責授太僕寺丞侍御史魏遜責授太府寺主簿侍御史王岳責授司農寺主簿初延州保安鎮將白文審聞兵興岐山專殺郡人趙思謙等十餘人已伏其罪

復下臺追繫推鞠未竟會去年五月十二日德音除十惡五逆放火殺人外並放盧損輕易卽破械釋文審帝大怒收文審誅之臺司稱奉德音釋放不得追領祇證中書詰云德音言不在追窮枝蔓無不得追領祇證六字擅改勅語大理斷以失出罪人論故有是命是月有蛇鼠鬪于師子門外鼠生而蛇死夏四月己未朔以左衛上將軍王景戡爲左神武統軍以右領軍上將軍李頊爲華清宮使戊辰以太子詹事盧演爲工部尙書致仕辛未以中書舍人史館修撰張昭遠爲禮部侍郎以前滄州節度使李金全爲右領軍上將軍是月有熊入

京城搏人五月辛卯以河東節度使兼大同彰國振武威塞等軍蕃漢馬步總管檢校太師兼中書令駙馬都尉石敬瑭爲鄆州節度使進封趙國公以河陽節度使充侍衛馬步軍都指揮使宋審虔爲河東節度使甲午以前晉州節度使大同彰國振武威塞等軍蕃漢副總管張敬達充西北面蕃漢馬步都部署落副總管乙未詔諸州兩使判官畿赤令有闕取省郎遺補丞博少列宮寮選擇擢任案以上疑有脫誤以忠正軍節度使侍衛步軍都指揮使張彥珙爲河陽節度使充侍衛馬軍都指揮使以彰聖都指揮使饒州刺史符彥饒爲忠正軍節度

使充侍衛步軍都指揮使丙申以雍王重美與汴州節度使范延光結婚詔充王從溫主之丁酉以國子祭酒馬縞卒廢朝戊戌昭義奏河東節度使石敬瑭叛以鴻臚卿兼通事舍人判四方館王景崇爲衛尉卿充引進使壬寅削奪石敬瑭官爵便令張敬達進軍攻討乙卯以晉州節度使張敬達爲太原四面兵馬都部署尋改爲招討使以河陽節度使侍衛馬軍都指揮使張彥琪爲太原四面馬軍都指揮使以陝州節度使相里金爲太原四面步軍都指揮使以右監門上將軍武廷翰爲壕寨使以陝州節度使相里金爲太原四面步軍都指

揮使丙辰以定州節度使楊光遠爲太原四面兵馬副
部署兼馬步都虞候尋改爲太原四面副招討使都虞
候如故以前彰武軍節度使高行周爲太原四面招撫
兼排陳使初帝疑河東有異志與近臣語及其事帝曰
石郎與朕近親在不疑之地流言毀譽朕心自明萬一
失歡如何和解左右皆不對翌日欲移石敬瑭於鄆州
房暉等堅言不可司天監趙延義亦言星辰失度尤宜
安靜由是稍緩其事會薛文遇獨宿于禁中帝召之論
以太原之事文遇奏曰臣聞作舍于道三年不成國家
利害斷自宸旨以臣料之石敬瑭除亦叛不除亦叛不

如先事圖之帝喜曰聞卿此言豁吾憤氣先是有人言
國家明年合得一賢佐主謀平定天下帝意亦疑賢佐
者屬在文遇卽令手書除日子夜下學士院草制翌日
宣制之際兩班失色居六七日敬塘上章云明宗社稷
陛下纂承未契輿情宜推令辟許王先朝血緒養德皇
闡儻循當璧之言免負閎牆之議帝覽奏不悅手攘抵
地召馬裔孫草詔報曰父有社稷傳之於子君有禍難
倚之于親卿于鄂王故非疎遠往歲衛州之事天下皆
知今朝許王之言人誰肯信英賢立事安肯如斯云戊
申張敬達奏西北面先鋒都指揮使安審信率雄義左

第二指揮二百二十七騎并部下共五百騎剽劫百井
叛入太原又奏大軍已至太原城下詔安審信及雄義
兵士妻男並處斬家產沒官先是雄義都在代州屯戍
其指揮使安元信謀殺代州刺史張朗事洩戍兵自潰
奔安審信軍審信與之入太原太常奏於河南府東權
立宣憲太后寢宮從之己酉振武節度使安叔千奏西
北界巡檢使安重榮驅掠戍兵五百騎叛入太原以新
授河東節度使宋審虔爲宣州節度使充侍衛馬軍都
指揮使壬子鄴都屯駐捧聖都虞候張令昭逐節度使
劉延皓據城叛翌日令昭召副使邊仁嗣已下逼令奏

請節旄六月辛酉天雄軍節度使劉延皓削奪官爵勒
歸私第癸亥以天雄軍守禦右捧聖第二軍都虞候張
令昭爲檢校司空行右千牛將軍權知天雄軍府事丙
寅御敷政殿遣工部尙書崔居儉奉宣憲皇太后寶冊
于寢宮時陵園在河東適會兵興故權于京城修奉寢
宮上諡焉己巳以西上閣門副使少府監兼通事舍人
劉頤爲鴻臚卿職如故庚午詔曰時雨稍愆頗傷農稼
分命朝臣祈禱辛未工部尙書致仕許寂卒以權知魏
府事右千牛將軍張令昭爲齊州防禦使以捧聖右第
三指揮使邢立爲德州刺史以捧聖第五指揮使康福

進爲鄭州刺史甲戌以汴州節度使范延光爲天雄軍
四面招討使知行府事丙子以西京留守李周爲天雄
軍四面副招討使兼兵馬都監詔河東將佐節度判官
趙瑩以下十四人並籍沒家產秋七月戊子范延光奏
領軍至鄴都攻城己丑誅右衛上將軍石重英皇城副
使石重裔皆敬瑭之子也時重英等匿于民家井中獲
而誅之并族所匿之家奚首領達刺干遣通事介老奏
奚王李素姑謀叛入契丹己處斬訖達刺干權知本部
落事辛卯沂州奏誅都指揮使石敬德并族其家敬瑭
之弟也乙未以前彰武軍節度使高行周爲潞州節度

使充太原四面招撫排陣使以潞州節度使皇甫立爲
華州節度使丁酉雲州節度使沙彥珣奏此月二日夜
步軍指揮使桑遷作亂以兵圍子城彥珣突圍出城就
西山據雷公口三日招集兵士入城誅亂軍軍城如故
辛丑以將作監丞介國公宇文頡爲汝州襄城令乙巳
以衛尉卿聶延祚爲太子賓客戊申范延光奏此月二
十一日收復鄴都羣臣稱賀己酉以禮部侍郎張昭遠
爲御史中丞以御史中丞呂琦爲禮部侍郎充端明殿
學士庚戌中書奏劉延皓賓佐等帥臣旣已削奪其行
軍司馬李延筠副使邊仁嗣以下望命放歸田里奏入

帝大怒詔大理曰帥臣失守已行削奪其寮佐合當何
罪旣而竟依中書所奏壬子詔范延光誅張令昭部下
五指揮及忠銳忠肅兩指揮繼范延光奏追兵遣襲張
令昭部下敗兵至邢州沙河斬首三百級并獻張令昭
邢立李貴等首級又奏獲張令昭同惡捧聖指揮使米
全以下諸指揮使都頭凡十三人并磔于府門癸丑左
衛上將軍仇暉卒洺州奏擒獲魏府作亂捧聖指揮使
馬彥柔以下五十八人邢磁州相次擒獲亂兵並送京
師彰聖指揮使張萬廸以部下五百騎叛入太原詔誅
家屬于懷州本營八月戊午契丹遣使美稜舊作梅里
今改正

入朝己未以汴州節度使范延光爲天雄軍節度使守
太傅兼中書令以西京留守李周爲汴州節度使檢校
太尉同平章事癸亥應州奏契丹三千騎迫城詔端明
殿學士呂琦往河東忻代諸屯戍所犒軍以左龍武大
將軍袁義爲右監門上將軍以振武軍節度使安叔千
充代北兵馬都部署己巳雲州沙彥珣奏供奉官李讓
勲送夏衣到州縱酒凌轢軍都行刼殺兵馬都監張思
慤都指揮黨行進其李讓勲已處斬訖張敬達奏造五
龍橋攻太原城次戊寅以鎮州節度使董溫琪充東北
面副招討使己卯洺州獻野蘭二十斤辛巳張敬達奏

賊城內出騎軍三十隊步卒三千人衝長連城高行周襲殺入壕溺死者大半擒賊將安小喜以下百餘人甲馬一百八十匹九月甲辰張敬達奏此月十五日與契丹戰于太原城下王師敗績時契丹主自率部族來援太原高行周符彥卿率左右廂騎軍出圍蕃軍引退已時後蕃軍復成列張敬達楊光遠安審琦等陣于賊城西北倚山橫陣諸將奮擊蕃軍屢却至晡我騎軍將移陣蕃軍如山而進王師大敗投兵仗相籍而死者山積是夕收合餘眾保于晉祠南晉安寨蕃軍塹而圍之自是音聞阻絕朝廷大恐是日遣使侍衛步軍都指揮使

符彥饒率兵屯河陽詔范延光率兵由青山路趨榆次
詔幽州趙德鈞由飛狐路出敵軍後輝州防禦使潘環
合防戍軍出磁隰以援張敬達以前絳州刺史韓彥恁
爲太子賓客契丹主移帳于柳林乙巳詔取二十二日
幸北面軍前戊申帝發京師路經嶽陵帝親行謁奠夕
次河陽召羣臣議進取盧文紀勸帝駐河橋庚戌樞密
使趙延壽先赴潞州辛亥幸懷州召吏部侍郎龍敏訪
以機事敏勸帝立東丹王贊華爲契丹主以兵援送入
蕃則契丹主有後顧之患不能久駐漢地矣深以爲然
竟不行其謀

遼史義宗傳云倍雖在異國常思其親問
安之使不絕後明宗養子從珂弒其君自

立倍密報太宗曰從珂弑君盍討之是東丹王實帝自啟兵端唐君臣或知其陰謀故龍敏之說不行

是酣飲悲歌形神慘阻臣下勸其親征則曰卿勿說石

郎使我心膽墮地其怯憊也如此冬十月丁巳夜彗星

出虛危長尺餘壬戌詔天下括馬又詔民十戶出兵一

人器甲自備

案契丹國志云唐發民爲兵每七戶出征夫一人自備鎧仗謂之義軍凡得馬二千

餘匹征夫五千人民間大擾與薛史互有詳畧今附錄于此戊辰代州刺史張朗超

授檢校太保以其屢殺敵眾故以是命獎之癸酉幽州

趙德鈞以本軍三千騎與鎮州董溫琪由吳兒谷趨潞

州十月戊子以趙德鈞爲諸道行營都統以趙延壽爲

河東道南面行營招討使以劉延朗副之庚寅以范延

光爲河東道東南面行營招討使以李周副之帝以呂琦嘗佐幽州幕乃命賁都統官告以賜德鈞兼犒軍士琦至從容宣帝委任之意德鈞曰旣以兵相委焉敢惜死德鈞志在併范延光軍奏請與延光會合帝以詔諭延光延光不從丁酉延州上言節度使楊漢章爲部眾所殺以前坊州刺史劉景嚴爲延州留後庚子趙德鈞奏大軍至團柏谷前鋒殺蕃軍五百騎范延光奏軍至榆次蕃軍退入河東川界潘環奏隰州逐退蕃軍壬寅趙德鈞奏軍出谷口蕃軍漸退契丹主見駐柳林砦時德鈞累奏乞授延壽鎮州節制帝怒曰德鈞父子堅要

鎮州苟能逐退蕃戎要代予位亦甘心矣若翫寇要君
但恐犬兔俱斃德鈞聞之不悅閏月丙辰日南至羣臣
稱賀于行宮帝曰晉安寨內將士應思家國矣因泣下
久之丁巳以岢嵐軍爲勝州辛酉以右龍武統軍李從
昶爲左龍武統軍以前邠州節度使楊思權爲右龍武
統軍壬戌丹州刺史康承詢停任配流鄧州時承詢奉
詔率義軍赴延州義軍亂承詢奔鄜州故有是責甲子太
原行營副招討使楊光遠殺招討使張敬達于晉安寨
以兵降契丹時契丹圍寨自十一月以後芻糧乏絕軍
士毀居屋茅淘馬糞削松栝以供秣飼馬尾鬣相食俱

盡楊光遠謂敬達曰少時人馬俱盡不如奮命血戰十
得三四猶勝坐受其弊敬達曰更少待之一日光遠伺
敬達無備遂殺之與諸將同降契丹時馬猶有五千匹
戎王並以漢軍與石敬瑭其馬及甲仗卽齎驅出塞丁
卯戎王立石敬瑭爲大晉皇帝約爲父子之國改元爲
天福戎王與晉高祖南行趙德鈞父子與諸將自團栢
谷南奔王師爲蕃騎所蹙投戈棄甲自相騰踐擠于巖
谷者不可勝紀已已帝聞晉安寨爲敵所陷詔移幸河
陽時議以魏府軍尙全戎王必憚山東未敢南下車駕
可幸鄴城帝以李崧與范延光相善召入謀之薛文遇

不知而繼至帝變色崧躡文遇足乃出帝曰我見此物
肉顛肉顛適欲抽刀刺之崧曰文遇小人致誤大事刺
之益醜崧因請帝歸京王申車駕至河陽甲戌晉祖與
戎王至潞州戎王遣蕃將大詳袞舊作相溫今改正率五千騎
送晉高祖南行丁丑車駕至自河陽時左右勸帝固守
河陽居數日符彥饒張彥琪至奏帝不可守城是日晚
至東上門小黃門鳴鞘於路索然無聲己卯帝遣馬軍
都指揮使宋審虔率千餘騎至白馬坡言踏陣地時諸
將謂審虔曰何地不堪交戰誰人肯立于此審虔乃請
帝還宮庚辰晉高祖至河陽辛巳辰時帝舉族與皇太

后曹氏自燔于玄武樓晉高祖入洛得帝燼骨于火中
來年三月詔葬于徽陵之封中帝在位共二年年五十

三永樂大典卷七千一百七十四

五代史闕文晉高

祖引契丹圍晉安寨降楊光遠清泰帝至自覃懷京
師父老迎帝于上東門外帝垂泣不止父老奏曰臣等
伏聞前唐時中國有難帝王多幸蜀以圖進取陛下何
不且入西川帝曰本朝兩川節度使皆用文臣所以立
宗僖宗避寇幸蜀今孟氏已稱尊矣吾何歸乎因慟哭
入內舉

族自焚

史臣曰末帝負神武之才有人君之量由尋戈而踐阼
慙德應深及當此以居尊政經未失屬天命不祐人謀
匪臧坐俟焚如良可悲矣稽夫衽金甲于河壩之際斧
眺樓于梁壘之時出沒如神何其勇也及乎駐革輅于

舊五代史卷四十八終
覃懷之日絕羽書于汾晉之辰涕淚沾襟何其怯也是
知時之來也雕虎可以生風運之去也應龍不免爲醢
則項藉悲歌于帳下信不虛矣

永樂大典卷七
千一百七十四

舊五代史卷四十八終

舊五代史卷四十八攷證

唐末帝紀下五月辛卯以河東節度使兼大同彰國振
武威塞等軍蕃漢馬步總管檢校太師兼中書令駙
馬都尉石敬瑭爲鄆州節度使進封趙國公 案歐
陽史廢帝紀于五月以前卽書石敬瑭反與晉本紀
自相矛盾據是書五月辛卯始移敬瑭于鄆州戊戌
始聞拒命也五代春秋通鑑俱與是書同

戊戌昭義奏河東節度使石敬瑭叛 案通鑑作昭義
節度使皇甫立奏石敬瑭叛

乙卯以晉州節度使張敬達爲太原四面兵馬都部署

舊五代史卷四十八 五十四
尋改爲招討使 案通鑑乙巳以張敬達兼太原四面排陣使丙午以爲太原四面都部署丁未又知太原行府事不言其爲招討使歐陽史又作都招討使與是書微異

捧聖第五指揮使康福進 康福進疑當作康福據冊府元龜引薛史亦作康福今姑仍其舊

誅右衛上將軍石重英皇城副使石重裔皆敬瑋之子也 案重英通鑑作重殷又通鑑攷異引廢帝實錄作姪男尙食使重乂供奉官重英並與是書不同

九月甲辰張敬達奏此月十五日與契丹戰于太原城

下 案張敬達及契丹戰于太原是書晉紀作辛丑
蓋辛丑日戰越四日甲辰乃奏到也通鑑亦作辛丑
遼史作庚午與是書異歐陽史作甲辰戰于太原殊
誤

詔范延光率兵由青山路趨榆次 范延光遼史避太
宗諱作范延廣

甲子太原行營副招討使楊光遠殺招討使張敬達于
晉安寨以兵降契丹 案楊光遠降契丹歐陽史通
鑑俱作閏十一月甲子五代春秋作十一月誤

契丹主以漢軍與石敬瑭其馬及甲仗卽齎驅出塞

舊五代史卷四十八
案遼史云所降軍士及馬五千匹以賜晉帝與是書
異通鑑從是書

丁卯契丹立石敬瑭爲大晉皇帝 案契丹立晉是書
晉高祖紀作十一月丁酉此紀作閏月丁卯前後互
異據通鑑攷異引廢帝實錄亦作丁卯蓋契丹立晉
在十一月丁酉唐人至閏十一月丁卯始奏聞也實
錄誤以奏聞之日爲立晉之日是書唐紀亦仍其誤
達喇罕舊作達刺干今改 摩哩舊作梅里今改 大
詳袞舊作大相溫今改
舊五代史卷四十八攷證